

UGÁNU BUÍTI LE LABÚRÜJABEI LÚCAS LUÁGU JESÚSU

Labúrüjani Lúcas lé meja asúseredubei

¹ Lun Teófilo le weírigubei. Gíbeeña güirígia oúchutiña jabúrüjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabúrüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun. ³ Áu gíñe, álügüdajaadina gíñe buídu buídu libúgürü sun cátei le asúseredubei lúmagiñe lagúmeserun, áni affíñetina luágu maríban lan lun nabúrüjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagúriajóun Juan le abásteragüdajabei

⁵ Dán meja le Heródes lan urúeibei Judéa, ñíñein meja ában fádiri lánina jafíñen jurú, gíríti Zacarías, jádaangiñeti fádirigu ja lánigu Abías. Elisabét tíribei lúmari, jádaangiñetu giñe ladúgawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adúga jameí sun le lubeíbei darí lun siñá lan laríñawagún ni cáta wuríbati jawágu. ⁷ Masáanigutiña ladúga siñá lan tagáragüdün Elisabét, áni derébugugaaña gíñe jagía biángubei.

⁸ Luágu ában wéyu, lídan lidáni jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburi fádirigu jurú, lun jasúbudiruni cába

lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías. ¹⁰ Sun niján lan cupáli águdajoúa, añája gürígia boúgudi ayúmuragua lun Búngiu. ¹¹ Ábati lasáiragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebélurun anúfudei lídoun. ¹³ Ába laríñagun ánjeli ligía lun.

—Manúfudebá, Zacarías, ladúga agáamba láali Búngiu bayúmuragun, tagáraüdüba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba gíñe agúndaarutiña láu lagúriajoún, ¹⁵ ladúga weírígubei biraú ligíbugiñe Búngiu. Mátunbei diweín ni bínu, áni ñíbei Sífiri Sándu lúma lúmagiñe lubáragiñe lagúriajoún lun ladúndejani lídan sun cátei. ¹⁶ Ladúgüba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwidüba lun Búngiu láu sarágu ubáfu queí meja ladúgüni Elías. Laráansejaba lubá Jesúsu láu laráandaragüdüniña agúbürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachoúruni cátei le? Áu táu sun númari, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía ou-najabalina adímureja bun lun níchuguni ugánu buíti le bun. ²⁰ Guetó, quei mafíñerun bubei luágu le naríñagubei

bun, berédera merérunga, siñábei badímurejan daríme lagúriajouñ biraú. Lagúnfuliruba cátei le lídan lidáni.

²¹ Sun dan le, añájeti buga gürígia bougudi agúrabajei Zacarías, weírititi janígi luágu lílü témpulurugu. ²² Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü. ²⁵ “Ladúgüñein Búngiu lubuídun cátei le nun guelé lun lagídaruni nibúsigari jagíbugiñe gürígia.”

Lasúbudiragúdüni ában ánjeli luáguti lagúriajouñ Jesúsu

²⁶ Sísi játi lárigiñe, ába louñajani Búngiu ánjeli Gabriél lídoun ában ubúruugu lání Galiléa, gíríti Nazarét, ²⁷ lun lídin bisídoun ában wúri irájügiuru, gírítu María. Wúri tugúya, gadáraduñoun lúma ában wügúri gíríti José lun tamárieidun lúma, wügúri ligía, linébaanfán urúei Davíd. ²⁸ Ába lebélorun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügú jáu sun wúríña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagúriajan ában irájü, ábame bíchuguni líri Jesúsu. ³² Weírigubei, Liraú Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje.

³³ Lagúmadirubei linásiñun Israel lun sun dan, áni magúmuchadibei lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame louburagunibu lubáfu Búngiu. Ligía sándubei lubeí irájü le lúnbei bagúri-ajani, Liraú Búngiu lúba lagúarún. ³⁶ Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügúri irájü, ítara líña lubeíti, tó meja uáguboun jaríñaga luágu siñá lan tagáraüdü, njein sísi játi dageínaü tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adúgaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúruge le labádinaguabei buri wúbü Judéa, ⁴⁰ ába tebélu-run lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraú turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügú jáu sun jiñáriñu, binílaali gíñe biraú. ⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraú nurágeirugu láu ugúndani. ⁴⁵ Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rútu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasál-baragüle,

⁴⁸ lugúndun gudémejabujaali nun, nugúya le lidámun. Lúmagiñe guelé, jaríñaguba sun gürígia luágu fuleísei-waadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei,

adúgaali lun ni cáta jamá ja barúguabaña jóungua.

⁵² Gidálaaña ja gabáfubaña lídaangiñe jaweírigan, ja únabubaña, ába ladúgüniña lun weírigan jamá.

⁵³ Já buga lamábaña, quimúlegüda lumútiña, ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

⁵⁵ queí meja lidáradun jáma binádu wagúbürigu—

Abrahám jáma ladúgawagun—lun gudémejabu lan joun lun sun dan.

⁵⁶ Ába teréderun María úrüwa játi ñi, lárigiñe, ába tagíribudun jábiñoun.

Lagúriajoun Juan le abásteragüdjabei

⁵⁷ Ába lagúnfulirun dan lun tagúriajan Elisabét, ába tagúriajan ában wügúri irájü. ⁵⁸ Dan le jagáambun tubésinigu jáma tidújeñu luágu lubuídun cátei le ladúgübei Búngiu tun, ába jagúndaarun úara túma. ⁵⁹ Luágu liwídun wéyu, ába lerésibiruni circuncisión, le liseíni luágu láni lan Búngiu irájü ligía. Buséntiña yebéti jíchuguni líri lúguchi luágu, le Zacarías, ⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíríti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu. ⁶³ Ába lamúriajan ában murúsun fuláansu, ába labúrüdün luágun. “Juan líribei.” Ába laweíridun janígi súngebui láu cátei le. ⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. ⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu. ⁶⁶ Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoún luágu Wabúreme le Jabúngiutebei güriquia ja Israelítagu,

ladúga ñúbinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña jóungua lun, lúmagiñe meja binádu dan,

⁷¹ luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagúbürigu,

arúfudaleí luágu mabúlieidagun lan lueí lidáradun le sándubei jáma.

⁷³ Niján lé meja laríñagubei lun wáguchi Abrahám.

⁷⁴ luágu leséfurubadíwa lan jaweí wáganiñu, lun gayáraabei lan wesériwidun lun manúfudeiga,

⁷⁵ láu úarani, derégeguñu wagía woúngua lun, sun dan le wabágaridubei.

⁷⁶ Áni bugúya nisáaniraiü, láni Búngiu le íñubei proféta lúba bagúarúniwa,

ladúga baráansejaba lubá Wabúreme,

⁷⁷ subúdi lámuga úma lánina asálbaruni joun lánigu, le áubei ferúdunawa lan jafígoun.

⁷⁸ Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

⁷⁹ lun larúgoungadágüdün jáu ja lídaanbaña lubúriga lúma jáu ja luágubaña úma le ouwenibei lébeja, lúma lun ladúndejani wapásun lídoun úma le anúgüwaliwa lídoun darángilaü.

⁸⁰ Aweírideina ligíati irájü ligía, afáragadagueina gíñe lídan láni espíritu. Ába laganoún lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2

Lagúriajóuniwa Jesús

(Mt 1.18-25)

¹ Lídoun buga dan ligía, ába laríñagun urúei Augústo lun jabájüdün sun gürígia ja Rómabaña. ² Furúmiñe meja jadügüni cátei le, dán meja le Cirénio lan agúmadijabei Síria. ³ Súnti gürígia mósu jóudin jageíra lun ñi lan jabájüdúwa. ⁴ Ligía láfuridunbei José Nazarétgiñe,

loúbawagugiñe Galiléa, ába lídin loúbawagun Judéa lídoun fulásu le gíríbei Belén, le ñí lubei lagúriajouá Davíd, quei linébaanfan lubei Davíd José. ⁵ Ába lídin Belén lun labájüdún úara túma María to gadáradunboun lúma lun jamárieidun, áni dageíñañoun. ⁶ Dánti le añája lan ñi Belén, ába lachúlürün dan lun tagúriajan María. ⁷ Ába tagúriajani furúmiñeti tiraú ñi, ába toúburaguni tídan lágei, ába taróunragüdüni ñi tídan jában anímaalu ladúga úati ubáraü joun tídan jában chülüdügütiña.

Ánjeligu jáma óunigirutiña mudún

⁸ Lídan áraabu boúgudi lueí Belén, ñíñanu jouniri mudún, bou larúgan jáu óunigiraña jalúgüniña mudún. ⁹ Sódini, ába lasáliragun ában lání Wabúreme Búngiu ánjeli siélugiñe joun, ába jaríjin ában óunwenbun larúgounga le lánina Búngiu geyégua jáu, ába janúfudedagun. ¹⁰ Ába laríñagun ánjeli ligía joun.

—Manúfueda jumá, ladúga níjein ugánu buíti nanúgün jun, lébunabei sarágu ugúndani joun sun gürígia. ¹¹ luágu agúriajouáali lan ában asálbaragülei jun ugúñe, lageíra Davíd, Crístu le Jabúreme. ¹² Jadárirubei irájü ligía jouburagu tídan lágei, roun tídan jában anímaalu.

¹³ Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweíríguni lun Búngiu, jaríñaga.

¹⁴ ¡Uweíríguni lun Búngiu lídan líñutima siélu, darángilaü múarugu jádan gürígia ja ibíjubalin lufúlei-sein!

¹⁵ Dánti le jagríbudun ánjeligu járigoún siélun, ába jaríñagun jouniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóúdin furésegueina, ába jadárirunun María lúma José, lúma irájü roun tídan jában anímaalu. ¹⁷ Dan le jaríjibalin, ába jabájüdaguni le laríñagubei ánjeli joun libúgürü le. ¹⁸ Súnti ja agáambuliña, weíriti janígi láu le jaríñagubei. ¹⁹ Áni María, areídañu tíñein sun cátei le tídan tanígi, arítagua luágu. ²⁰ Ábati jagíribudun jóúniri mudún, adímurejeina weíri luágu Búngiu, luágu sun le jagáambubei lúma le jaríjibe, ladúga suséreti ítara quei laríñawagúniwa joun.

Larífudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubárañe tadágeinadun.

²² Dan le lagúnfulirunbei lidáani jarúmadun lagúbürigu Jesúsu según igáburi lídan lilúrudun Moisés, ába janúgüni irájü ligía ubúrugun Jerusalén lun jedéregeruni lun Búngiu. ²³ Jadúgünbalin líra ladúga laríñajare tídan lilúrudun Búngiu. “Sun furúmiñeti wügúri irájü agúriajóuti lúnbei Búngiu.” ²⁴ Ába lubeíti jóúdin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñíñein meja ában wügúri Jerusalén gíriti Simeón. Wügúri ligía ában wügúri buíti, weíriti ledéregeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón, ²⁶ áni arúfuda láali lun luágu moúnwenbei lan maríjingaleí Crístu le lúnbei louñajani Wabúreme Búngiu. ²⁷ Ába lídin wügúri ligía témpulurugun, ladúndejan Sífiri Sándu. Dánti le janúgünbalin

lagúbürigu Jesúsu Jesúsu témpulurugun lun jadúgüini le laríñagubei lúruđu láu, ²⁸ ába loúyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun noúnwen láu darángilaü, nugúya le esériwidubei bun,

ladúga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le boúnajabei joun sun gürígia.

³² Ítara lúba queísi ában lámpu lun larúfuduni inárüni joun ja mámabaña jurú,

ru ligíame uweíriguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le. ³⁴ Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni.

³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Níñoun gíñe ában wúri proféta, gíritu Ána, wúri tugúya liraú Fanuél, jádaangiñe ladúgawagun Áser. Weíriyaaru wúri tugúya, ñúraügiru meja tamárieidunbei, sédüñein irúmu táu lúma túmari, ába loúnwen, ³⁷ guetó, gádürü-weñ-gádürü irúmu táu. Máfuriduntuti témpulurugugiñe, terédera ñi esériwida lun Búngiu árieibu wéyuagu, ayúnara lúma ayúmuragua lun Búngiu. ³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰ Aweírdeina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

⁴¹ Ságüja irúmu jóúdin lagúbürigu Jesúsu ubúrugú Jerusalén lubá fédu le páscua, ⁴² áni dan le lagúnfulirunbei Jesúsu dúusu irúmu, ába jóúdin súnagubei Jerusalén quei le jagáburi lídan fédu ligía. ⁴³ Dánti le jagíribudun lárigiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jarítagún yebe luágu níten lan jádan gürígia ja jámarigubaña luágu úma. Ítara líña jadúgün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Úrüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weíriti janígi luágu lichú láu lúma luágu buri loúnabagüle. ⁴⁸ Dan le jaríjinbalin lagúbürigu, ába laweíridun janígi, ába taríñagun lúguchu lun.

—¿Cáme badúgei cátei le woun, niraú? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagríbudun jáma, Nazarétün, ába lasígirun láu meme lagáambadi joun. Ábati buri tareíduni lúguchu sun cátei le tarítangunrugun. ⁵² Niján mémeti Jesúsu aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdajabei, lídan fulásu mageírawati

(Mt 3.1-12; Mr 1.1-8; Jn 1.19-28)

¹ Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ² Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraú Zacarías, lídan fulásu mageírawati, ³ ába lebuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame. ⁴ Suséreti cátei le ítara queí meja labúrüdüni proféta Isaías, laríñaga. Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme, queísi ladárarúniwa úma surúti.

⁵ Labuínchagüdúwaba sun gudúungu, sun wúbü, lagurúaba, úma buri le segéti, lásururuba,

úma buri le múaragunti, lúwaradaguba.

⁶ Larijúbei sun uboú Wasálbaragüle, le loúnajabei Búngiu woun.”

⁷ Nñúbintiña sarágu gürígia lun Juan lun labáster-agüdúniña, ába laríñaga joun.

—Jarásan jéwe jugúya le! ¿Ca awísarubalün lun jeíbaagun lueí lanárime lafáyeiragüle figou le yaráfaal-ibei? ⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei naríñaguni jun, gayáraati ladúgün Búngiu linébaanfaangu Abrahám lídaangiñe buri dúbü le. ⁹ Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadúgüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafanreinraguni lúma le meíginbei.

¹² Nñúbintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadúgüni?

¹³ Laríñaga Juan joun.

—Magúburaja jumá lougiñe le uágubei laríñaga lúrudu.

¹⁴ Aríñagatiña gíñe fiú súdaara lun.

—Ángi wagía, ¿cági lúnbei wadúgüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madúgün lumúti, gufúruma jumá láu jafáyeiruaja.

¹⁵ Añájati gürígia madéraguagüdünja arítagua luágu fágua lan Juan Crístubei, ¹⁶ ába laríñagun Juan joun sún-gubei.

—Áu, láu dúna nabásteragüdaün, nítenbei ában le lún-bei labásteragüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagúruga ligeídin. ¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába loúndarún türígu buíti tídoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle. ¹⁹ Erérati gíñe lun gumándan Heródes luágu laganoún túma Heródias, to lúmari Felípe, le lamúlen, lúma luágu ámu buri cátei wuríbati le ladúgübei. ²⁰ Lubáragiñe ladúgün Heródes gásu láu, adúgarügü ligía ában cátei wuríbatimaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

²¹ Lubáragiñe ladaürúniwa Juan, dan le labáster-agüdüniña gürígia, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijíniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amúrü Niraú le jínsiñebei nun, gúndaatina báu.

Linébaanfaangu Jesúsu

(Mt 1.1-17)

²³ Queí burí darándi irúmu láu Jesúsu dan le lagúme-
 serunbalin luwádigimari le uágubei loúnajei Búngiu.
 Jarítawagúati luágu liraú lan José, José, liraú Elí, ²⁴ Elí,
 liraú Matát, Matát, liraú Leví, Leví, liraú Melquí, Melquí,
 liraú Jána, Jána, liraú José, ²⁵ José, liraú Matatías, Matatías,
 liraú Amós, Amós, liraú Nahúm, Nahúm, liraú Eslí, Eslí,
 liraú Nagái, ²⁶ Nagái, liraú Maat, Maat, liraú Matatías,
 Matatías, liraú Semeí, Semeí, liraú José, José, liraú Judá,
²⁷ Judá, liraú Joána, Joána, liraú Résa, Résa, liraú Zoroba-
 bél, Zorobabél, liraú Salatiél, Salatiél, liraú Néri, ²⁸ Néri,
 liraú Melquí, Melquí, liraú Adí, Adí, liraú Cosám, Cosám,
 liraú Elmodám, Elmodám, liraú Er, ²⁹ Er, liraú Josué,
 Josué, liraú Eliézer, Eliézer, liraú Jorím, Jorím, liraú Matát,
³⁰ Matát, liraú Leví, Leví, liraú Simeón, Simeón, liraú Judá,
 Judá, liraú José, José, liraú Jonán, Jonán, liraú Eliaquím,
³¹ Eliaquím, liraú Meléa, Meléa, liraú Mainán, Mainán,
 liraú Matáta, Matáta, liraú Natán, ³² Natán, liraú Davíd,
 Davíd, liraú Isaí, Isaí, liraú Obéd, Obéd, liraú Booz, Booz,
 liraú Salmón, Salmón, liraú Naasón, ³³ Naasón, liraú Ami-
 nadáb, Aminadáb, liraú Arám, Arám, liraú Esróm, Esróm,
 liraú Fáres, Fáres, liraú Judá, ³⁴ Judá, liraú Jacób, Jacób,
 liraú Isáac, Isáac, liraú Abrahám, Abrahám, liraú Taré,
 Taré, liraú Nacór, ³⁵ Nacór, liraú Serúg, Serúg, liraú Ragáu,
 Ragáu, liraú Pelég, Pelég, liraú Héber, Héber, liraú Sála,
³⁶ Sála, liraú Cainán, Cainán, liraú Arfaxád, Arfaxád, liraú
 Sem, Sem, liraú Noé, Noé, liraú Laméc, ³⁷ Laméc, liraú
 Matusalén, Matusalén, liraú Enóc, Enóc, liraú Jaréd, Jaréd,
 liraú Mahalaléel, Mahalaléel, liraú Cainán, ³⁸ Cainán, liraú
 Enós, Enós, liraú Set, Set, liraú Adán, Adán, liraú Búngiu.

4

*Loučhawagúniwa Jesúsu**(Mt 4.1-11; Mr 1.12-13)*

¹ Ába lígiruni Jesúsu fulásu loučhawagu dúna Jordán, buin láu lubáfu Sífiri Sándu, ába lanúgüni Sífiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia oučaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü. ³ Ábati laríñagun Máfia lun.

—Ánjein Liraú bubei Búngiu, salíguagüdadeí dúbü le feínme.

⁴ Laríñaga Jesúsu lun.

—Taríñajare Lerérun Búngiu. “Mámarügüba táu fein jabágarida güriquia, jabágariduba gíñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanúgüni Máfia Jesúsu luágun ában wúbü íñuti, ába larúfuduni sun fulásu le ubouágubei lun lídan ában. ⁶ Ába laríñagun Máfia lun.

—Níchugubei sun ubáfu lúma sun uweíríguni le bun ⁷ ánjabu ájuduragua nun lun banúgünina quei bubúngiute, báníbei súngubei, ladúga ibíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladúga taríñajare Lerérun Búngiu. “Judúguabá lun Búngiu le Babúreme, lúnrügüla beséri-wida.”

⁹ Lárigiñe, ába lanúgüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraú bubei Búngiu, chúguabá búngua yágiñe lun únabun, ¹⁰ ladúga taríñajare Lerérun Búngiu.

Loúnajabaña Búngiu láni ánjeligu lun jóúnigiruníbu,
 11 janúgübadibu jájaburugu lueí labúleiseirun bugúdi
 luágu dúbü.

12 Ába laríñagun Jesúsu lun.

—Tariñajare gñe Lerérun Búngiu. “Mouchaguabef
 Búngiu le Babúreme.”

13 Dánti le madárijali Máfia cába lan luwúyeri
 ouchwagúni ladúga lun Jesúsu, ába lígiruni lúngua
 luágu átiri dan.

Lagúmeseruni Jesúsu luwádigimari Galiléa

(Mt 4.12-17; Mr 1.14-15)

14 Ába lagíribudun Jesúsu Galiléoun buin láu lubáfu
 Sífiri Sándu, ába buríti ladímurejóun luágu lídan sun
 fulásu geyégua. 15 Arúfudajatija tídan jalígilisin juríu
 lídan sun fulásu, buíti jadímurejan sun gürígia luágu.

Jesúsu lídan ubúruagu Nazarét

(Mt 13.53-58; Mr 6.1-6)

16 Ábati lídin Jesúsu Nazarétün, le fulásu le ñí lubei
 lagúriajoúa, ába lebélorun tídoun jalígilisin juríu lídan
 wéyu le eméraaguagülei quei ligáburi yebu, ába larára-
 mun lun lalíjan tídan Lerérun Búngiu. 17 Ába jíchugunun
 lilíburun proféta Isaías lun, dan le ladáranun, ába
 ladáriruni le ñí lubei laríñaga ítara.

18 Níjein láni Búngiu Sífiri Sándu nuágu,
 ladúga anúadaja láadina lun níchuguni ugánu buíti joun
 gudémetiña,
 oúnaja láadina lun námaliyaniña ja nidíjeribaña tídan
 janígi,

lun náfuridagüdüniña adaürútiña,
 lun níchugun aríjini joun maríjintiña,
 lun neséfuruniña ja ouserúabaña wuríba,

¹⁹ lun nadímurejan luágu dan le fuleíseijabu lan Búngiu joun güρίgia.

²⁰ Ába ladáurunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei, ²¹ ába lagúmeserun adímureja, laríñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weirititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraú José le?

²³ Ába laríñagun Jesúsu joun.

—Subúsiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adúga báalibe Capernaúm, adúgabei giñe ya bageíra.”

²⁴ Ába lasígirun adímureja, laríñaga.

—Nínárün jáu luágu úa lan ni ában proféta erésibirúati buídu lageíra. ²⁵ Choúru numúti luágu añajein lán meja sarágu würiña ja jiláguañábaña jámarigu jádan Israelítagu lídan meja lidáani proféta Elías, dan le májuyun lubeí júya luágu úrüwa irúmu dimí, ába ñi lan sarágu ilamaü fulásurugu, ²⁶ áni moúnajan lumúti Búngiu Elías túmoun ni ában jádaangiñe würiña jiláguaaña jámarigu jagía ja aganoubaña Israél, loúnajei túmoun ában to aganouboun Sarépta, yaráfa lun ubúругu Sidón. ²⁷ Ñíñanu meja giñe sarágu gawágutiña gumeín luágu jára ñi Israél lídan lidáani proféta Eliséo, úati ni ában jádaangiñe areí-dawaguagüdüti lueídügüya Naamán le Síriana.

²⁸ Dan le jagáambunbalin sun ja ñíbaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janúgüni lábulugun wúbü le gagíbuagubalin fulásu lun jájuchuruni ñígiñe.

³⁰ Ába lásügürün Jesúsu jamídaanguágiñe jámagua, ába lídin.

Ában wügúri gawáguti espíritu wuríbatí

(Mr 1.21-28)

³¹ Ábati lídin Jesúsu Capernaúm, ában fulásu le lí-daanbei Galiléa, ába larúfudajan joun güriquia ñi lídan wéyu le eméraaguagülei. ³² Weírititi janígi láu ligáburi larúfudajan, ladúga láu ubáfu ladímureja.

³³ Ñíñeinti ában wügúri ligílisirugu, gawáguti espíritu wuríbatí, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agúnrinchaguawa? Subúdi numútibu, áni subúdi numúti luágu amúrú lan Liraú Búngiu le sándubei.

³⁵ Ába ladeínjan Jesúsu lun espíritu wuríbatí ligía, ába laríñagun lun.

—¡Maníba, furíba lídaangiñe güriquia le!

Ábati lájuchuruni espíritu wuríbatí wügúri ligía múarugun jagíbugiñe súngubei, ába láfuridun lídaangiñe, mabúleiseirunga. ³⁶ Ába laweíridun janígi súngubei, ába jaríñagun jámagua.

—¿Cáteisán buri dimúrei le? ¡Adímurejati wügúri le láu gumádi lúma ubáfu joun espíritugu wuríbatíña, ába jáfuridun!

³⁷ Adímurejóatiti buri luágu Jesúsu lídan sun fulásu geyégua.

Lareídaguágüdünun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun

lareídaguagüdüünun. ³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídaguagüdüün Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le lá-fuachun wéyu ába janúgüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. ⁴¹ Sarágu jaña gíñe ja gawágutiña espíritugu wuríbatíña, ába jagídarúniwa jaweí, ába buri jagúaragun ítara.

—Amürü le Liraúbei Búngiu.

Ába ladeínjan Jesúsu joun espíritugu wuríbatíña, mí-girun lumútiña lun jadímurejan, ladúga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúrugú lídoun ában fulásu mageírawati. Ába jálua-jani gürígia, ába jachúlürün le ñjín lubeí, buséntiña yebe jeréderuni lueí lídin, ⁴³ ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladúga lun líra noúnajoúa.

⁴⁴ Ítara líña lídin apúrichijeina tídan buri jalígilisin juríu, Galiléa.

5

Esénijani le láubei miláguru

(Mt 4.18-22; Mr 1.16-20)

¹ Luágu ában dan, ñíñein Jesúsu láru dúna le Gene-sarét, ábati jayábingua sarágu güri-gia darí lun jámu-rudaguni, ladúga busén jamá jagáambuni lerérun Búngiu.

² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábati ládínun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfu-daja joun güri-gia ñígiñe. ⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun árie-bu, mañúguntiwa ni cáta, quei amúrú lubeí aríñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábati jadúgün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdü-nun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügúri gaffigounti nugúya.

⁹ Laríñagubaalin Simón líra ladúga laweíridun lanígi, jáu sun ja úarabaña lúma, luágu añúguni le jadúgübei. ¹⁰ Weíríti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja güri-gia nun.

¹¹ Lárigiñeti játürün, ába jígiruni sun cátei, ába jóúdin lúma Jesúsu lun láni jamá disípulugu.

Lareídaguagüdün Jesúsu ában gawáguti gumeínluágu sun lúra

(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñí lubei ában wügúri gawáguti gumeín luágu sun lúra. Dan le laríjinbalin wügúri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, ánjabu busén, gayáraati bareídaguagüdünina.

¹³ Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín lueí wügúri ligía, ¹⁴ ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñídünrügübá, arúfudagua búngua lun fádiri, rúbeíme edéweejani le uágubei laríñaga lilúrudun Moisés luágu barúmadun, aríja jamámugei gürígia luágu areídaguadibu lan.

¹⁵ Eíbu dan, eíbu labúrchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídaguagüdüni jasándi. ¹⁶ Ábaja lídin Jesúsu le ñíjin lumúti úa jamá gürígia lun layúmuragun lun Búngiu.

Lareídaguagüdün Jesúsu ában fadáguaali

(Mt 9.1-8; Mr 2.1-12)

¹⁷ Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña. ¹⁸ Ábati jayábin fiú

wügúriña barúina ában wügúri fadáguwaali tídan ában ubárari, jálugati jebélaagüdüni le ñíjin lubei Jesúsu lun laríjini. ¹⁹ Madáritiña jalágiñeba lan jebélura ladúga jíbe güri-gia, ábati jaweínrun tábulugun múna, ába jagí-darun murúsun lueígiñe loúgiñe le ñí lubei Jesúsu, ába jarárigüdüni sánditi tídan lubárari ligíbugiñoun. ²⁰ Dan le laríjinbalin Jesúsu affíñeni le jawágubei, ába laríñagun lun sánditi ligía.

—Wügúri, ferúdunawaali bifígoun.

²¹ Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisan güri-gia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figoú lueídügüya Búngiu.

²² Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³ ¿Cátima méreengúnbei laríñawagun. “Ferúdunawaali bifígoun”, ódi “Sarába, beíbuga”? ²⁴ Narúfudaaliti jun luágu gayára lan ferúduna nan figoú, áu le Wügúri Garaúwarügüti.

Ábati laríñagun lun le sándibei.

—Sarába, barúboun bubárari, beíba búbiñoun.

²⁵ Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu.

²⁶ Ába laweíridun janígi sún-gubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Laqúarun Jesúsu lun Leví lun lánime disípulu

(Mt 9.9-13; Mr 2.13-17)

²⁷ Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna

gumádi, gíríti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

²⁸ Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

²⁹ Lárigiñe, ába ladúgün Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu gürígia ñun luágu dábula jáma. ³⁰ Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. ³² Máma niábiña áluaja magádietiña ligíbugiñe Búngiu, niábiña áluaja gafígountiña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Mr 2.18-22)

³³ Ábati jaríñagun lun Jesúsu.

—¿Ída liñasan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulu, jóútiña, gurá jagía súnwandan?

³⁴ Ába laríñagun Jesúsu joun.

—¿Gayáraati funági jayúnaragüdüniña gürígia ja jamí-surajan lídoun ában maríei sun niján lan adári jáma ñi?

³⁵ Lachúlürüba dan lun lídin adári, ligíameti jayúnarun.

³⁶ Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga ítara, lagádeiruboun to isérigiruboun, áni merédebei gíñe murúsun gamísa iséri ligía buídu tuágu anáanguni ñulújaru tugúya. ³⁷ Michugúntu gíñe diweín iséri lídoun guéru ñulújali, ánjein adügúwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati gíñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

Jabúdajan disípulugu türígu lídan wéyu le eméraaguagülei
(Mt 12.1-8; Mr 2.23-28)

¹ Luágu ában wéyu le eméraaguagülei, eíbugeina líña Jesúsu labádinagua nádü jáma láni disípulugu, átüjeina jagíati disípulugu lin türígu, ába jéferejani láu jájabu, ába jeígini líla. ² Ábati jaríñagun jádaangiñe fariséogu joun.

—¿Cásan uágu jadúga wadágimanu le moún lumuti ladügún lídan wéyu le eméraaguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma? ⁴ Ába lebélorun tídoun lúban Búngiu, ába lanúgün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügúñanu lán yebe lúnbaña jeígin tídaangiñe fein tugúya, según lilúrudun Moisés, áni máma figou le ladügübei Davíd ligíbugiñe Búngiu.

⁵ Aríñagati gíñe joun.

—Gabáfutina, áu le Wügúri Garaúwartügüti, lun naríñagun cába lan gayára ladügúniwa wéyu le eméraaguagülei.

Wügúri le jiláalibei újabu
(Mt 12.9-14; Mr 3.1-6)

⁶Lídaanya ában wéyu le eméraaguagülei, ába lebélorun Jesúsu tídoun jalígilisin juríu, ába lagúmeserun arúfudaja. Níñein ában wügúri jiláli lújabu le loúnwenren, ⁷añájati arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubeí lun lídan wéyu le eméraaguagülei, lun jadárirun lidúnrun. ⁸Subúdi lumúti ca lan jarítagubei, ába laríñagun lun wügúri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi. ⁹Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügún lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰Ábati laríaguniña Jesúsu sun ja geyégubaña láu, ába laríñagun lun wügúri ligía.

—Tulébei bújabu.

Ába látuleruni, ába lareídagun. ¹¹Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmuchun láu Jesúsu.

Lanúadajaniña Jesúsu dúusu apóstolugu
(Mt 10.1-4; Mr 3.13-19)

¹²Lídoun dan ligía, ába lídin Jesúsu luágun ában wúbü ayúmuragua lun Búngiu. ¹³Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴Niján jíribei. Simón, le méme líchubei Pédro, Andrés, le lamúlen

Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraú Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu gürígia

(Mt 4.23-25)

¹⁷ Ába larárirun Jesúsu jáu lueígiñe wúbü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu gürígia ñúbin-tiña loúbawagugiñe Judéa, Jerusalén, lúma lárurugugiñe Tíro lúma Sidón. Sun gürígia ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wurí-batiña, areídaguátiña gíñe. ¹⁹ Álugatiña sun gürígia jagúrurun luágu Jesúsu, ladúga areídaguagüda lumútiña súngubei láu lubáfu.

Fuleíseiwatiña jáma fugiábugu

(Mt 5.1-12)

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibei, ladúga mén-reengúnbei jun lun jebélurun lídoun larúeijan Búngiu.

²¹ ‘Fuleíseiwatün, jugúya le áfaagubei ilámaü guetó, ladúga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

²² ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriua, dan le janábaganün, dan le janúgüni jíri queí ni cáta, quei cátei wuríbati, nueígiñe, áu le Wügúri Garaúwarügüti. ²³ Gúnda jumá sarágu, buin jumá láu ugúndani lídan wéyu ligía,

ladúga jibíjuba ában oúnwenbun afáyeirujaiü siélu, ítara méme líña meja jadúga binádu jagúbürigu gürígia ja joun profétagu.

²⁴ ‘Fugiábugu jugúya, jugúya le rísibei, ladúga ibíja jumáli sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladúga jalámachuba.

‘Fugiábugu jugúya le éjerajabei guetó, ladúga jayájua-jaba láu íruni.

²⁶ ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagúbürigu buíti jawágu profétagu yéetiña.

Jínsiñe jamá jáganiñu jun

(Mt 5.38-48, 7.12)

²⁷ ‘Niján nerérun jun, Jugúya le agáambubalina. Jínsiñe jamá jáganiñu jun, adúga jumá buíti joun ja iyéree-jabúbaña jun, ²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjabu láfara ában gürígia luágu ában louba bigíbu, rúbei gíñe le ában louba lun, le anúgütü babíte bueí, rúboun gíñe bisímisin lun. ³⁰ Furúmieguarügü le amúriajati búma, rúba lun, le anúgüti bumégen, máluajabeí lúma. ³¹ Le cátei le babúseerubei ladügün bun, ligalá badúga joun ámu.

³² ‘Ánjein já rügúñanu lubeí jínsiñejabúbaña jun jínsiñe jun, ¿ca buíti jadúgübei láu líra? Ásta gafígountiña, ítara líña jadúga. ³³ O ánjaün lan adúga buíti jóun-rügü ja adúgübaña buíti jun, ¿ca buíti jadúgübei láu líra? Ítara líña gíñe jadügün gafígountiña. ³⁴ Ánjaün afúredeija jóunrügü ja úmagiñebaña jarítagua jibíjin som cátei, ¿ca buíti jadúgübei láu líra? Afúredeijatiña gíñe

ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiñu jun, adúga jugúyame buíti, afúre-deija jugúyame, magúrabajaanga ni cáta lewéñegua. Ítara lúba weíri lan jafáyeiruaja lúmagiñe Búngiu le íñugubei, áni lirájüñübadün gíñe le tímatimaati, ladúga ligía, fuleí-seijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan júguchi Búngiu.

*Madímureja jumá wuríba jawágu ámu
(Mt 7.1-5)*

³⁷ ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladúgüba jun queígubeirügü jadúga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? ⁴⁰ Úati ni ában disípulu weíriguti lueí lumáesturun, íbini ánjein lagúmucha latúriajan, chülúrügübei quei lumáesturun.

⁴¹ ‘¿Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubeí baríñagun lun bíbugaña. “Sagánei liraúraü ífei le bágurugubei”, áni masándi bumúti durúsu le bágurugubei? ¡Biánguañein bigíbu! Sagábei durúsu le bágurugubei furúmiñe, gayára

lámuga baríjini liraúraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ ‘Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. ⁴⁴ Sun tídibu wéwe subúdiwati luágu lin, mátüjountu ígo lueígiñe jíyu, ni beíbei lueígiñe guríbiyuwa. ⁴⁵ Gürígia le buídubei, cátei buíti laríñagubei ladúga cátei lan buíti tídaanbei lanígi, gürígia le wuríbati, cátei wuríbati laríñagubei ladúga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bían ébuu

(Mt 7.24-27)

⁴⁶ ‘¿Ca uágu jaríñaga luágu áu lan Jabúremebei áni madúgün jumúti le nubeíbei? ⁴⁷ Naríñagaali jun ída líña lan le ñúbinbei nun áni adúgaleí le nubeíbei. ⁴⁸ Ítara líña quei ában wügúri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladúga luáguñoun lan ébuu derébuguti. ⁴⁹ Ánjeinti le agáambubalina áni madúgün lumúti le nubeíbei, ítara líña quei ában wügúri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagúnrinchagun le gumúti.

7

Lareídaguagüdüni Jesúsu lumúsun ában gumándan Rómana

(Mt 8.5-13)

¹ Dan le lásurunbei ladímurejan Jesúsu joun güriǵia, ába lídin Capernaúm. ² Níñein ában gumándan Rómána ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen. ³ Dan le lagáambunbei gumándan ligía luágu Jesúsu, ába loúnajan fiú jádaangiñe wügúriña wefrigutiña lídan jaffínen juríu lun jayúmura-gun lun Jesúsu lun lídin areídaguagüdei lumúsun. ⁴ Ába jóúdin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ ladúga jínsiñetiwa wagía juríu lun, ligía guánarügü ábunaguagüdübarun walígilisin.

⁶ Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manúgün ban bubéresegun ñúdüñ lúbiñe, luágu nege madúna lan lun bebélurun lúbiñoun, ⁷ ligía nege mídin lubeí lúngua álu-gabu. Rúrügübeí dimúrei, ábame lareídagun lumúsun. ⁸ Ladúga ligía nege gíñe lábugiñeñein gumádi íñutimaati, áni añájein gíñe súdaara lábugiñe lagúmadijan. Dan lé nege laríñagun lun ában jádaangiñe lun lídin, ñúdüñti, dan le laríñagun lun le ában lun liábin, ñúbinti, áni dan le loúnajani lumúsun adúga som cátei, adúga lumúti. Ítara lúba nege, luágu berérun mósu lídin sándi lueí lumúsun.

⁹ Dan le lagáambunbalin Jesúsu cátei le, weíríti lanígi láu wügúri ligía, ába laríjin jawágun gürígia ja afálarubalin, aba laríñagun joun.

—Nínárün jáu, ni íbini jádan Israelítagu madárigidina affíñeni weíríti quei laffínen wügúri le.

¹⁰ Dánti le jachúlürünbei wügúriña ja ñúdünbaña álugei Jesúsu járigoún lúbiñoun gumándan, areídaguaali lumúsun.

Láguyuaguágüdüni Jesúsu tiraú ában jiláali túmari

¹¹ Lárigiñe cátei le, lídiña Jesúsu lídoun ában ubúru gu gíríti Naín, úareina jáña láni disípulugu lúma, jáma sarágu gürígia. ¹² Dan le lachúlürünbei yaráfa lun lubéneri ubúru gu ligía, ába laríjin jóudin ábunaja ában jiláali le ligíarügüti tiraú lúguchu to jiláali túmari. Sarágu jáña lílana fulásu ñúdün ábunaja túma. ¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anúgübaña. Ába laríñagun lun jiláali.

—Írájü, ¡naríñaguña bun lun básaarun!

¹⁵ Ábati lásaarun lé buga jiláalibei, ába lagúmeserun adímureja. Ába ledéregeruni Jesúsu tun lúguchu. ¹⁶ Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chúlúgua ában proféta weíriguti wádoun.

Aríñagatiña gíñe.

—Ñúbinja Búngiu íderaguawa, wagía le lumútuniña.

¹⁷ Ába lagaambúniwa cátei le ladúgübei Jesúsu lídan sun Judéa lúma geyégua láu.

*Loúnagülegu Juan le abásteragüdajabei
(Mt 11.2-19)*

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe, ¹⁹ ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu. ²⁰ Dan le jachúlürünbei le ní lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdajabei álügüdabu ánjein amúrü lubeí Crístubei le lúnbei liábin, o ánjein lun lubeí wagúrabun ámu.

²¹ Lídán méme óra ligía, areídaguagüdati Jesúsu sarágu gürígia lídaangiñe jasándi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe gürígia le meféridirun lumúti lafíñen nuágu.

²⁴ Lárigiñe jóúdin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali? ²⁵ Ánjein máma lubeí ítara líña, ¿cáti jídinbei aríja? ¿Ában wügúri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu. ²⁶ Lídán linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügú

láu proféta. ²⁷ Juan, ligía oúnagülei le uágubei taríñaga Lerérun Búngiu.

Noúnajañein noúnagüle bubáragiñe

lun laráansejani úma bubá.

²⁸ Quei naríñaguni jun, jádan sun gürígia, úagili proféta weíriguti lueí Juan, áni láu sun líra, weíriguti le únabuti-maabei lídan larúeijan Búngiu sügú láu le anúgarügübalin ugánu luágu arúeijani ligía.

²⁹ Dan le jagáambunbalin sun gürígia, ásta ja agúbura-jabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáli meja labásteragüdajan Juan, ³⁰ ánjañati jibe-ágei fariséogu jáma arúfudajatiña lilúrudun Moisés, májatiña meja lun jadúgüni le lubeíbei Juan, merésibirun jamúti lé yebe labúseerubei Búngiu ladúgün luágu jafúleisein.

³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja añúurubaña mágidirugu ájurerera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jíruti jun, mayájuntün.” ³³ Ladúga ñúbinti Juan le abásteragü-dajabei, lé meja meíginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügúri Garaúwarügüti, joutina áni gurá áu. Jaríñaga luágu geígadina, gátadi, jamáda áu nege gaffigountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷ Níñounti ában wúri wuríbati témeri lídan ubúругu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadúdüragüdüni lugúdi láu táguira. Nuján ayájuaaja, nuján arágajei láu tídíburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügúri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bián wügúriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun wúri tugúya, ába laríñagun lun Simón.

—¿Aríagu bíña tun wúri to? Belútina búbiñoun, míchutibu dúna nun lun nachíḃuni nugúdi, ánjounti wúri to, ágawagüda tumúti nugúdi láu táguira, ába tamábeidagüdüni láu tíḃiburi. ⁴⁵ Machú bumútina, án-joun tugúya, lúmagiñe nebélurun, merédegili tachújani nugúdi. ⁴⁶ Míchutibu aílí nábulugu, ánjoun tugúya, túguatu ibíñei jémeti luágu nugúdi. ⁴⁷ Ligía naríñagun-bei bun luágu arúfuda láani luweírín tínsiñejabu luágu ferúdunawa lan líbe tífigoun, ánjeinti gürígia le míbeti ferúdunawa lan, míbeti ínsiñeni larúfudun.

⁴⁸ Ábati laríñagun Jesúsu tun wúri tugúya.

—Ferúdunawaali bífigoun.

⁴⁹ Ábati jagúmeserun amísurajouítiña ja ñúnbaña lúma ñi aríñaga jámagua.

—¿Cáteisan wügúri le, ferúduna lubeí gíñe figou?

⁵⁰ Ába laríñagun Jesúsu tun wúri tugúya.

—Sálbawádibu lídaangiñe bífigoun ladúga bafíñerun nuágu, beíba darángilañu.

8

Würíña já buri meja íderaguti Jesúsu

¹ Lárigiñe cátei le, ñúdünti Jesúsu lídoun sarágu ubúругu lúma buri lirájüñü fulásu íchigei ugánu buíti luágu larúeijan Búngiu. ² Ñúdütiña dúusu apóstolugu lúma jáma würíña ja lareídaguagüdübaña jádaangiñe espíritugu wuríḃatiña lúma sándi. Ñíñoun María to gírí-boun Magdaléna jádan, to ídaangiñeboun jáfurida sédü espíritugu wuríḃatiña, ³ ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti
(Mt 13.1-9; Mr 4.1-9)

⁴ Sarágu jáña gürígia ñúbinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun úma, ába jadúgüraguni ásügürütiña, ába jeígini dunúru.

⁶ Líbiri, ába láburujan labádinaguoún dúbü, dánti le laboúchun, ába lásáürün ladúga lumábei fulásu. ⁷ Ába láburujan líbiri labádinaguoún jíyu, ába láfaruni jíyu le ájüchübei úara lúma. ⁸ Níñein gíñe lídaangiñe, áburujati lídoun múa buíti, dan le laweínamudun, gin ligía, buíti lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu
(Mt 13.10-17; Mr 4.10-12)

⁹ Ábati jálügüdüni láni disípulugu ca lan lílabei jémpulu le. ¹⁰ Laríñaga joun.

—Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun lun ibídiñebei lan líla cátei le jaríjibei joun, lun gíñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti
(Mt 13.18-23; Mr 4.13-20)

¹¹ Ába laríñagun Jesúsu joun.

—Niján líla jémpulu ligía. Líla nádü, ligía lerérun Búngiu, ¹² úma le ñíjin lubeí láburuja lídaangiñe líla nádü, jagía gürígia ja agáambubalin lerérun Búngiu, ába liábin Máfia, ába lagídaruni tídaangiñe janígi lun maffínerun jamá, masálbarun jagíame. ¹³ Dúbü le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afíñetiña luágu murúsun dan, áni dan le jóuchawagún, mawándun jamúti, ába jeféridiruni jaffínen luágu Búngiu. ¹⁴ Jíyu le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irísini lúma ugúndani le lánina uboú le, úati fulásu jarítaturugun lun lerérun Búngiu, siñátiti laságarún cátei buíti jádaangiñe. ¹⁵ Ánjeinti múa buíti le ñíjin lubeí láburuja líbiri líla nádü, jagía gürígia ja agáambubalin lerérun Búngiu táu anígi buítu, adúga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu

(Mr 4.21-25)

¹⁶ Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdüñ múnada, lun gayára lan jaríjin ja ebélurubaña jabárua. ¹⁷ Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machúlürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun

Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu

(Mt 12.46-50; Mr 3.31-35)

¹⁹ Ábati tachúlürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladúga jíbe gürí-gia. ²⁰ Ába laríñawagún lun.

—Nujántia búguchu jáma bamúlenu boúgudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu léruga

(Mt 8.23-27; Mr 4.35-41)

²² Luágu ában wéyu, ába ládinun Jesúsu tídoun ában ugúnein jáu lání disípulugu, ába laríñagun joun.

—Queímoun loubáfurugun lagúnu.

Ába jóúdin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei. ²⁵ Ábati laríñagun joun disípulugu.

—¿Ca susérebei lun jafíñen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügúri le, gumádi lubáli garábali lúma lugúdi barána áni agáamba jameí?

*Wügúri Gadárana le gawágubei espíritugu wuríbatíña
(Mt 8.28-34; Mr 5.1-20)*

²⁶ Ába jachúlürün loúbawagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába liábin ában wügúri lílana fulásu ligía lubádun. Lújali wügúri ligía gawágu espíritugu wuríbatíña. Madáüti anáanguni, maganoún ligía tídan múna, lídan buri jabára jiláaña le achigíti luágu dúbü lagánawa. ²⁸ Dan le laríjinbalin wügúri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera nómoun, Jesúsu Liraú Búngiu le Ínugutimaabei? Ayúmuraguatina bun lun masúfuri-ragüdün bánina.

²⁹ Laríñagunbei ítara ladúga lagúmadiruñein lan Jesúsu espíritu ligía lun láfuridun lídaangiñe. Saráguja weíyaasu lárügüdüni espíritu wuríbati ligía, ábaja jagúraguni gürí-gia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritu lídoun fulásu le mageírawati. ³⁰ Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladúga gíbeeña espíritugu wuríbatíña ja ebélurubaña lídoun. ³¹ Ába jamúriajan espíritugu jagía lúma Jesúsu lun moúnajan lániña máfiougatin. ³² Queíti ñíñanu jamá sarágu büüruju eíga luágu ában wúbü yaráfa, ába jayúmuragun espíritugu jagía lun lun loúnajaniña jádoun büüruju jagía, ába lán-jarun Jesúsu. ³³ Ábati jáfuridun espíritugu wuríbatíña jagía lueí wügúri ligía, ába jebélurun jádoun büüruju, ábati

jáguragun büüruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

³⁴ Dan le jaríjinalin ja oúnigirubaliña büüruju cátei le asúseredubei, ába janúfudedagun, ába jeíbaagun abájüdaguei ubúругu lúma áraabu. ³⁵ Ábati jóúdingua gürígia aríjei cátei le asúseredubei. Dan le jachúlürünbei le ñí lubei Jesúsu, ába jadáriruni wügúri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areídaguaali, ába janúfudedagun. ³⁶ Játi buga aríjubalin, ába jabájüdaguni luáguti lareída-gun wügúri lé buga gawágubei espíritugu wuríbatíña joun, ³⁷ ába jayúmuragun lílana fulásu ligía lun Jesúsu lun lídin ñígiñe, ladúga janúfude. Ábati ládinun Jesúsu tídoun ugúnein lun lídin, ³⁸ ába layúmuragun wügúri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

³⁹ —Giríbubá búbiñoun, ábame babájüdaguni sun le ladúgübei Búngiu bun.

Ába lídin, ába labájüdaguni le ladúgübei Jesúsu lun lídan sun fulásu ligía.

*Liraú Jáiro túma wúri to agúrurubarun lanáangun Jesúsu
(Mt 9.18-26; Mr 5.21-43)*

⁴⁰ Dan le lagíribudunbei Jesúsu loubáfurugun lagúnu, ába jerésibiruni gürígia láu ugúndani ladúga sun jagía agúrabañu jánein. ⁴¹ Ábati liábin ában wügúri giríti Jáiro, le ábanbei jádaangiñe tábutigu jalígílin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladúga ában rügúñoun liraú, queí buri dúusu irúmu táu, toúwe. Dan le lídinbei Jesúsu, ába jafálaruni sarágu gürígia darí lun jámurudaguni.

⁴³ Ñíñounti ában wúri jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴ Ába tayárafadun lun Jesúsu lanágangiñe, ába tagúruruni táru lanáangun, lídan méme óra ligía ába tareídagun.

⁴⁵ Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdajagidibu ca lan agúrurubei buágu?

⁴⁶ Ába laríñagun Jesúsu.

—Gurúwaali nuágu, ladúga sandí numuti luágu areídaguagüdaadina lan gürígia láu nubáfu.

⁴⁷ Dan le tasúbudiruni wúri tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía. ⁴⁸ Ábati laríñagun Jesúsu tun.

—Niraú, areídaguaadibu ladúga bafíñerun nuágu. Beíba darángilañu.

⁴⁹ Ñígili Jesúsu adímureja, ligía lachúlürün ában lúbiñegiñe Jáiro, ába laríñagun lun Jáiro.

—Jilá biraú, mebéresejadügüyabá lun Maésturu.

⁵⁰ Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraú.

⁵¹ Dan le lachúlürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagúbürigu irájü tugúya. ⁵² Jayájuña sun ja ñíbaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

⁵³ Ába jéjerajan láu ladúga subúdi jamáni luágu jilá tan. ⁵⁴ Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

⁵⁵ Ába tágyugun, ába tásaarun lídan méme óra ligía, ába laríñagun Jesúsu lun jíchugun eígini tun. ⁵⁶ Weíríti janígi tagúbürigu, ába laríñagun Jesúsu joun lun mabájüdagun jamáni le asúseredubei ni ca un.

9

Loúnajaniña Jesúsu dúusu apóstolugu apúrichija (Mt 10.5-15; Mr 6.7-13)

¹ Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri es-píritugu wuríbatíña lúma lun jareídaguagüdün sánditiña. ² Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña. ³ Laríñaga joun.

—Manúga jumá ni cáta júmagua luágu juweíyasun —ni bádun, ni ságü, ni fein, ni seínsu. Ábanrügütá símisi janügün. ⁴ Furúmieguaügü múna to ñjín lumúti jachúlüra, reídei jumá ñi darí jídin lídaangiñe fulásu ligía. ⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóúdin.

Loúnwen Juan le abásteragüdjabei

(Mt 14.1-12; Mr 6.14-29)

⁷ Ába lagáambun gumádimati Heródes luágu sun cátei le ladúgübei Jesúsu, ibídiñetiti lun cába lan larítagua, ladúga ñíñanu aríñagutiña luágu saráli lan Juan lí-daangiñe oúweni, ⁸ jíbiri aríñaga luágu proféta Elías lan achúlaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe oúweni. ⁹ Ába laríñagun Heródes.

—Áu guánarügü oúnajabei adúrürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábati louchun Heródes laríjini Jesúsu.

Leígagüdün Jesúsu seíngü mílu wügúriña

(Mt 14.13-21; Mr 6.30-44; Jn 6.1-14)

¹⁰ Dan le jagíribudun apóstolugu, ába jabájüdagun lun Jesúsu luágu sun le jadúgübei. Ábati lanúgüniña lídoun fulásu mageírawati yaráfa lun Betsáida. ¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña gürígia ja, ñúdün jamámuga áluga jabára lun jeméraagun, áluaja jagíame eígini lídan buri lirájüñü aúdü lúma lídan buri fulásu yaráfati, ladúga úati ni cáta ya.

¹³ Laríñaga Jesúsu joun.

—Rújuma eígini joun.

Jaríñaga lun.

—Seíngü rügúñoun fein wáma jáma bián úduraü, án-jawa gubeírügü ñúdün agáñija eíginí joun sun gürígia ja.

¹⁴ Yaráfañanu jóun seíngü mílu wügúriña ñi, mabájüdünga würiña jáma irájüñü. Ába laríñagun Jesúsu joun láni disípulugu.

—Ñurúgüda jumáña dimí dimí-san.

¹⁵ Ába jadügüni ítara, ába jañúurun súngubei. ¹⁶ Ábati lanúgünun Jesúsu seíngü fein lújaburugu jáma bián údu-raü, ába laríjin siélun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷ Joútiña súngubei quimúle, dan le jabúdajanun ígiragutu, buíngüdatiña dúusu faníñe láu.

Laríñaguni Pédro luágu Jesúsu lan Crístubei

(Mt 16.13-19; Mr 8.27-29)

¹⁸ Luágu ában wéyu dan le layúmuraguña lan Jesúsu lábugua, ñíñanu láni disípulugu díseraü lueí, ába laríñagun joun.

—¿Ída liñásan jarítangun gürígia nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüda-jabei amúrü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amúrü.

²⁰ Ábati laríñagun joun.

—Ángi jugúya, ¿cátanagi lídan jarítangun?

Laríñaga Pédro lun.

—Crístu, le loúnajabei Búngiu lun lasálbaruniña gürí-gia, amúrü.

*Ladímurejan Jesúsu luágu louñwen**(Mt 16.20-28; Mr 8.30-9.1)*

²¹ Ába laríñagun Jesúsu joun láu éregu lun maríñagun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügúri Garaúwarügüti. Janúgübadina wügúriña weírigutiña lídan jaffñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lúruwan wéyu lúnya nabágaridun.

²³ Lárigiñe, ába laríñagun joun súngebui.

—Le busénti nánigu lan, bulfeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queísi lanúgüni ában wügúri lugúruwan, falálana. ²⁴ Ladúga le abúseeruti leséfuragun lúngua ya ubouágu lefériðirubei ibágari le magúmuchaditi, ánjein le ánjabei lefériðiruni libágari ya ubouágu nueígiñe, libíjubei ibágari le magúmuchaditi siélu. ²⁵ ¿Cági ju lan lun gürígia lagáñeiruni sun le lánina ubou, lefériðireime lubára siélu o lagúnrinchaguba lan lúngua? ²⁶ Le anúgüti busíganu nuágu lúma luágu nerérun, áu le Wügúri Garaúwarügüti, nibúsigaribadina gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷ Ninárün naríñaguni jun luágu añajein lan jádaangiñe ja yábaña guetó, moúnwenbaña maríjinga jameí larúeijan Búngiu.

*Lámuñedagun laríjín Jesúsu**(Mt 17.1-8; Mr 9.2-8)*

²⁸ Queíburí wídü wéyu lárigiñe laríñaguni Jesúsu cátei le, ába laweínrun luágun ában wúbü ayúmuragua lun Búngiu, barú lumútiña Pédro, Jacóbo, lúma Juan lúmagua.

²⁹ Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun. ³⁰ Ábati jasáriragun Moisés lúma Elías ayánuja lúma, ³¹ geyégu líña ában larúgounga weíríti jáu, jayánujaña libúgürü ouweni le lúnbei lasúfuriruni Jesúsu, Jerusalén. ³² Láu sun luweírín lidábu lágu Pédro jáma líbirigu, marúmuguntiña, aríja jamúti luweírígún Jesúsu jáma bián wügúriña ja lúmabaña. ³³ Dan le adísedeinaña bián wügúriña jagía lueí Jesúsu, ába laríñagun Pédro lun.

—Maésturu, ¡lídán dan awánja lan ya! Adúga wamá úrúwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan laríñagubei. ³⁴ Súnti niján lan adímureja, ába líábin ában juánriñu ouburaguaña, ába janúfudedagun ladúga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraú le jínsiñebei nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáli lan Jesúsu. Reídeitiña maníñu, maríñagun jamúti cátei le jaríjubei lun ni ában lídán dan ligía.

Lareídaguagüdüin Jesúsu ában irájü gawáguti espíritu wuríbati

(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wúbü, sarágu jáña güriña ñüdüntiña lubároun Jesúsu. ³⁸ Ábati lagúaragun ában wügúri jádaangiñe láu umálali jéreti, laríñaga.

—Maésturu, fuleíseijabubá nun, aríjabeí niraú le ligía rügúñebei, ³⁹ níjein ában espíritu wuríbati luágu, dan le

lárügüdüni, ába lagúaraguagüdüni, ába loúwejan, ába lá-furijan jacútaü liyúmulugugiñe. Añáwurija lumúti, májati lígiruni. ⁴⁰ Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

⁴¹ Ába loúnabun Jesúsu, laríñaga.

—¡Jugúya gürígia mafíñeraditiña, wuríbatiñal! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barúbei biraú ñájoun.

⁴² Dán yebe le lídin irájü ligía lun, ába lájuchuruni espíritu wuríbati múarugún, ába loúwejagüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi.

⁴³ Ába laweíridun janígi súnigubei láu luweírigun Búngiu.

Ladímurejaanya Jesúsu luágu loúnwen

(Mt 17.22-23; Mr 9.30-32)

Sun añája lan láu luweírin janígi láu le ladúgübei Jesúsu, ába laríñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügúri Garaúwarügüti, jájaburugun náganiñu.

⁴⁵ Úati gunfaráanda jamáni disípulugu le laríñagubei, ladúga darúñu líña jasáminan lun cátei le, áni janú-fudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?

(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ quei lasúbudiruni Jesúsu jasáminan, ába lanúgün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jídan, ligía weírigutimaabei.

Le mámabei wágani, wámagiñeñein

(Mr 9.38-40)

⁴⁹ Ábati laríñagun Juan lun Jesúsu.

—Maésturu, aríjatiwa ában wügúri aságajati espíritugu wuríbatina lídan bíri, ába wewéridiruni ladúga máma lan ában wádaangiñe.

⁵⁰ Laríñaga Jesúsu lun.

—Mewéridira jumeí, ladúga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügúniwa Jesúsu siélun, ába ladúgüni luweíyasun Jerusaléoun láu anígi. ⁵² Ába loúnajan loúnagülegu lubá, ába jóudin lídoun ában liraúraü fulásu láni Samária lun jáluajan muna lubá, ⁵³ májatiña Samariána jerésibiruni ladúga jaríjin luágu leíbuga lan Jerusaléoun. ⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmuchun jáu queí meja ladúgüni proféta Elías?

⁵⁵ Ábati ladígiragun Jesúsu jawágun, ába ladeínjan joun, laríñaga.

—Íbídiñeti jun luágu wuríba lan cátei le jayúmajabei.

⁵⁶ Máma niábiña, áu le Wügúri Garaúwarügüti, agúnrinchaguei jabágari gürígia, niábiña asálbarei.

Ábati jóudin lídoun ámu liraúraü fulásu.

*Já yebe busénbaña jafálaruni Jesúsu
(Mt 8.19-22)*

⁵⁷ Dan le luágu jamá úma, ába laríñagun ában wügúri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügúri Garaúwarügüti, úati ni jalába lan nabálachagüdei nichúgü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen núguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichijeí ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ay-ouúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

10

*Loúnajaniña Jesúsu úrüwa-wein-díisi disípulugu
apúrichija*

¹ Lárigiñe cátei le, ába lanúadajan Jesúsu úrüwa-weindiisi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi. ² Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubeí jamúriajan lúma Búngiu lun loúnajan ñadágimeintiña jagánaguouún. ³ Jeíba, nouñajañadün quei mudún jádoun anímaalu gáñitiña. ⁴ Manúga jumá ságü júmagua, ni seínsu, ni geídi, meréderagun jugúyame ayánuja ni ca úma luágu úma. ⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añajein lubeí gürígia jínsiñejabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan múna tugúya, giríbugüda jumeí abúsuruni. ⁷ Reídei jumá tídan múna tugúya to ñí lubei jerésibirúa, jou jumeíme, gurá le íchugúti jun úouga busíganu, ladúga garíchatí ñadágimeinti lun lafáyeiruaja. Masáansija jumá múna. ⁸ Dánme le jachúlürün lídoun ában ageíraü le ñí lumuti jerésibirúa, jóújumei le íchugúti jun, ⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰ Ánjaün achúlüra lídoun ában ageíraü le ñí lumuti merésibirúniwa jumá, furíjuma lídoun buri úma, jaríñagame. ¹¹ “Ásta licáliquín jageíra le luágubei wagúdi furú wamuti lun warúfuduni jun luágu magúndan wamá láu jigáburí, áni subúdi jumeí luágu subúdigüdáwaali lan luáguti larúeijan Búngiu jun.” ¹² Naríñajare jun

luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügú láu jabeichún lílana ubúругu le Sodóma.

Lílana ageíraü buri magáambaditiña

(Mt 11.20-24)

¹³ ¡Fugiábu jugúya lílana Corazín! ¡Fugiábu jugúya lílana Betsáida! Ladúga lun jamúga ubúругu lan Tíro o Sidón ladügúwa buri miláguru le adügúbei lídan jubúrugute, binárü jamúga lasáansiragua jagáburí lílana, ába jamúga jarúfuduni láu jadáuragun lúdu lúma balgi. ¹⁴ Ánjein jugúya, lídaanme luwéyuri agúseruni, weíritimaabei jabeichúniwa sügú jáu gürígia Tírona jáma Sidónna. ¹⁵ Amúrüti, ubúругu le Capernaúm, ¿jarítaguatibu luágu liñurúaba lan bíri queísi líñun siélu? Larári-rawagüdüwaba bíri únabun queísi lúnabun máfiougati.

¹⁶ Ába laríñagun Jesúsu joun úrüwa-wein-díisi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Núguchi le oúnajabalina.

Jagíribudun úrüwa-wein-díisi disípulugu

¹⁷ Ába jagíribudun úrüwa-wein-díisi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburí leíguadun Máfia siéluñe quei ában labíríjanouga. ¹⁹ Rújadina ubáfu jun lun jadúgüragun jéwe jáma águru, masúfurirunga ni cáta,

lúma lun jére lan jubáfu lueí lubáfu Máfia. ²⁰ Láu sun líra, magúndaara jumá luágu jagáambunün espíritu, gúnda jumá luágu níjein lan jíri bürúwañu tídan lilíburun Búngiu siélu.

Lagúndaarun Jesúsu
(Mt 11.25-27, 13.16-17)

²¹ Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, iñúragüda numúti bíri, ladúga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja loúguabaña ufúrendeí queísi irájüñü. Ánja, Núguchi, ladúga ítara líña babúseeruni.

²² ‘Derége láali Núguchi sun cátei nun. Úati ni ában subúdíjbuti cáтана lan lueídügüya Núguchi, úati gñe ni ában subúdíjbuti cáteiñein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jounrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ ladúga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídan ában guríriguai, ñíñein ában arúfudajati lilírudun Moisés, abúseeruti loúchaguni Jesúsu, ába lásaarun, ába laríñagun lun.

—Maésturu, ¿cábasan nadúga lun gayára lan nibíjini ibágari magúmuchaditi?

²⁶ Laríñaga Jesúsu lun.

—¿Cáteigi bürúwañubei lídan lilúrudun Moisés? ¿Ída liñágia balíjan ñi?

²⁷ Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badúga ítara, bibíjubei ibágari magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰ Ábati loúnabuni Jesúsu, laríñaga lun.

—Ñínein ában wügúri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jilá mémeeli. ³¹ Ába lásügürün ában jafádirin juríu lídaangiñe méme úma ligía, dan le laríjinbalin wügúri ligía, mebéresenti láu, ába lasígiruni leíbugun loubáfurugugiñe úma. ³² Sügú ligía ában jádaangiñe ladúgawagun Leví ñígiñe, dan gíñe le laríjini wügúri buleíseiwaali ligía, ába gíñe lasígiruni leíbugun loubáfurugugiñe úma, mebéresenga gíñe láu. ³³ Ábati lásügürün ában wügúri Samariána aweíyasujati lídaangiñe úma ligía, dan le laríjinbalin, ába lagúdemedagun lun. ³⁴ Ába liábin, ába lagáranijan lun bíti buri le luágubei láu aáli túma diweín, ába lagúraguni. Ába laweínragüdüni luágu lilügün burígü, ába lanúgüni tídoun jában chülúdügütiña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni

lun tabúreme múna, laríñaga lun. “Toúnigibeí wügúri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe úrúwa wügúriña ja líbiribeí le ueíbeí líwerujoúa, lídan barítangun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badúga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachúlürün lídoun ában liraúraü fulásu le ní lubei terésibirei ában wúri gíritu Márta, túbiñe. ³⁹ Níñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weíríti teténirun lun tubéresegun. Ába taríñangun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nábugua? Aríñagabá tun lun tíderangunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügúniwa, áni úabei ni ában lun lagídaruni tueí.

11

*Larúfudajani Jesúsu ayúmuraguni lun Búngiu
(Mt 6.9-15, 7.7-11)*

¹ Luágu ában wéyu, layúmuraguña Jesúsú lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsú lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébewalá bíri.

Núbinlá bidáani lun barúeijan ya ubouágu,

adügúwalá bugúndan ubouágu quei ladügún bugúndan siélu.

³ Rúboun fein buídurügütu woun lun wéyu le ugúñebei.

⁴ Ferúdunabeí wuríbati le adúga wamáalibei quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati gíñe Jesúsú joun.

—Niján ában jémpulu jun. lídin jamúga ában jídaangiñe lúbiñe ában lumáda amídi áriebu, ába laríñagun lun.

“Numáda, furédeibá úrúwa fein nun, ⁶ ladúga sun líña lachúlürün ában numáda núbiñoun áni úati ni cáta núma lun níchugun lun.” ⁷ Ába jamúgati louñabun le ában múnadagiñe, laríñaga jamúga.

“Mebéreseja bána, darúnaali nubéneri, áni roúnjadina jáu sun nisáanigu, siñáti násaarun íchiga ni cáta bun.” ⁸ Nariñaguña jun luágu íbini lan jamúga másaarun lan íchigoun lun ladúga lumáda lan,

lásaaruña jamúga íchigoun lun lueí lasígirun ebéreseja lun. ⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰ Ladúga sun le

amúriajati, ibíjati, le áluajati, daríti, le adaúnjati luágu béna, junrénwati lun.

¹¹ ¿Gayáraabei funági líchugun ában úguchili jí-daangiñe dúbü lun liraú dan le lamúriajan fein lúma? ¿o líchugun lan ában jéwe lun dan le lamúriajan úduraü? ¹² ¿o líchugun lan ában águru lun dan le lamúriajan gañein? ¹³ Gíchigadijadün ligía cátei buíti joun jirájüñü láu sun juríban, ¡gúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu njein lan lubáfu Máfia lúma Jesúsú
(Mt 12.22-30; Mr 3.19-27)

¹⁴ Níñein Jesúsú aságara ában espíritu wuríbati lueí ában wügúri le madímuregüdün láalibeí yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵ Níñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügúri le espíritugu wuríbatiña.

¹⁶ Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu. ¹⁷ Queíti subúdi láani le jarítagubei, ába laríñagun joun.

—Furúmieguarügü arúejani le afánreinraguti lun jageíndagun jámagua, lagúnrinchaguba, ában gíñe família fánreinguatiña ladúga wuríbu, jagúnrinchaguba gíñe. ¹⁸ Anjein gíñe njein lubeí fánreinguau jádan Máfia jáma lánigu, ¿ída lubági ladúrarun lubáfu? Naríñagunbalin le, ladúga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia, ¹⁹ áni anjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu

líra, jagía guánarügü arúfuda jamúti luágu bulíeigua jumá. ²⁰ Le inárünibeí, láu lubáfu Búngiu naságaja espíritugu wuríbatíña, áni arúfuda lumúti líra luágu chülújali lan larúeijan Búngiu lídoun fulásu le.

²¹ ‘Ába wügúri jéreti, dan le aráanseñu lan, toúnigi lúban buídu, sun le lúbiñebei chouúruti. ²² Ánjein ñúbin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanúgüni le labúseerun, ába lafánreinraguni jáma lumádagu.

²³ ‘Le mámabei númagiñe, náganiñein, le míderagun lumútina, güríngua lumúti le nadúgübei.

Espíritu wuríbatí le agíribudúbei

(Mt 12.43-45)

²⁴ Ába laríñagun Jesúsu.

—Dan le láfuridun ában espíritu wuríbatí lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to ñígiñe lubeí náfurida.” ²⁵ Dánti le lagíribudun, ába ladáriruni gürígia buga ligía quei ában múna to buí-dawaru, aráanserúa. ²⁶ Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lí-dan gürígia ligía, wuríbatimaajaliti le gádaanbalin wügúri ligía lueí buga furúmiñe.

Ugúndani le tímatimaati

²⁷ Dan le niján lubeí Jesúsu aríñagei cátei le, ába tagúaragun ában wúri jádaangiñe gürígia, taríñaga.

—¡Fuleíseiwatu jiñáru to agúriajabalibu, fuleíseiwatu to átagüdübalibu!

²⁸ Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

*Amúriajatiña gürígia wuríbatíña miláguru lúma Jesúsu
(Mt 12.38-42; Mr 8.12)*

²⁹ Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás. ³⁰ Ítara queí meja le asúsere-dubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügúri Garaúwarügüti, ligíaba ában seíni joun gürígia ja lánina dan le luágu Búngiu lan oúnajabalina. ³¹ Dánme le lidáni agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasádiruniña, ladúga tugúya, ñúbintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügú láu Salomón áni májatün jagáambunina. ³² Lídan mémeme agúseruni ligía, ábame gíñe jásaarun já meja aganoúbaña ubúrugu Nínive, ábame jasádiruniña ja lánina dan le, ladúga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weíriguti sügú láu Jonás, áni májatün lun jagáambunina.

*Lilámpun úgubu
(Mt 5.15, 6.22-23)*

Ába lasígirun Jesúsu aríñaga.

³³ —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundun joun ja ebélurutiña. ³⁴ Ítara líña águu

quei ában lámpu lun úgubu, ánjein buídu lubeí bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubeí bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi. ³⁵ Toúnigibá lun mabúrigadun lan bilámpun. ³⁶ Ánjein jarúgounga lubeí láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

³⁷ Dan le lagúmuchunbei ladímurejan Jesúsu, ába lamí-surajani ában fariséo eíga lúbiñe. Ába lebélorun Jesúsu, ába lañúurun luágu dábula. ³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eíginí. ³⁹ Ába laríñagun Wabúreme Jesúsu lun.

—Jugúya fariséogu ragá jumuti wéru lúma asiedu boúgudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿Ibídíñeti jun luágu le lan adúgübalin le boúgudigiñebei, ligía lan gíñe adúgübalin le múnadagiñebei? ⁴¹ Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe boúgudigiñe jibíti.

⁴² ¡Fugiábugu jugúya fariséogu! Adúgatün díisi fán-reinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madúgüntün gásu láu ísuruni lúma línsiñejabu Búngiu. Ligía lúnbei jadúgüni, mígirunga jumeíme jadúgüni le ában.

⁴³ ‘¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígílisin, busén jugúya lun labúsurún jun láu sarágu inébesei úmada.

⁴⁴ ‘¡Fugiábugu jugúya fariséogu, biángua tigíbu!, ladúga ítara jíña quei umúajaü le marijinti, sügú jagía gürígia ligíbuagugiñe ibídiñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

⁴⁶ Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anúgüni júrüti joun ámu, áni jugúya, májatün janúgün ni murúsun lídaangiñe.

⁴⁷ ‘¡Fugiábugu jugúya!, ladúga rújumuti dúbü arítaguagüleime luágu jamúaja profétagu já meja jáfaragubaña binádu jagúbürigu. ⁴⁸ Láu líra, arúfuda jumúti luágu gúnda jumá láu le jadúgübei binádu jagúbürigu, jagía áfaragubaliña, jugúya wédegüda jumúti jamúaja.

⁴⁹ ‘Ligía laríñagunbei meja Búngiu láu lichú láu. “Nóunajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰ Ligía lagúseragüdübaña lubeí Búngiu gürígia ja lánina dan le luágu játa profétagu ja áfarawagúbaña lúmagiñe ladügün ubou, ⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jóúwegun profétagu.

⁵² ‘¿Fugiábugu jugúya arúfudajatiña lilúrudun Moisés!, ladúga ragú jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

⁵³ Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴ lun jaríjin ánjaña adárira lidúnrun.

12

Larúfudajan Jesúsu luágu mabuídun lan biángua lan igíbu

¹ Ába jóundaragun sarágu mílu gürígia, gíbetiña darí lun jachúinragun jóungua. Ába lagúmeserun Jesúsu aríñaga jóúntima láni disípulugu.

—Toúnigi jumátia jaweí fariséogu, ítara líña jagáburi quei ísi—biánguañein jagíbu. ² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajóuba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Naríñajare jun, numádagu, moún lumuti janúfudedun jaweí gürígia ja gabáfubaña lun jáfarunün jilágubei, lárigiñe líra siñá jadúgün ámu cátei jun. ⁵ Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílá janúfudeda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti

Búngiu ni ában jádaangiñe. ⁷ Ánjeinti jugúya, íbini ídiburi le jábulugubei abájúda láali Búngiu ában ában. Manúfude jumá lubefti, gebégitün sügú jáu sarágu dunúru ligíbugiñe Búngiu, áni loúnigiruñádün.

Ja meyéedagunbaña luágu Jesúsu jagíbugiñe gürígia

(Mt 10.32-33, 12.32, 10.19-20)

⁸ ‘Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba gíñe luágu nánigu jamá jagíbugiñe láni Búngiu ánjeligu.

⁹ Ánjaña ja aríñagubaña jagíbugiñe gürígia luágu máma jamá nánigu, naríñaguba gíñe jagíbugiñe láni Búngiu ánjeligu luágu máma jamá nánigu.

¹⁰ ‘Furúmiegurügü le aríñaguti cátei wuríbati nuágu, áu le Wügúri Garaúwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹ ‘Dánme le janügún ligíbugiñoun lúru lu jagúserun, o jagíbugiñoun lan tábutigu jalígilisin juríu, madíjerida jumá luágu cába lan jóunaba o cába lan jaríñaga, ¹² dánme le lachúlürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani lueí leténirún sarágu lun irisini

¹³ Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Laríñaga Jesúsu lun.

—¿Cági íchubalina quei agúseragüdüti o quei afánrein-jati jídan?

¹⁵ Aríñagati gíñe ítara.

—Toúnigigua jumá júngua lueí luweínamu águu, ladúga máma lueiñe líbe lúmati gürígia labágarida sarágu dan.

¹⁶ Ábati líchuguni jémpulu le joun, laríñaga.

—Ñíñein méja ában wügúri rísiti, ába líchugun lichári alúbajouíni buíti. ¹⁷ Ábati laríñagun rísiti le lúnguarügü. “¿Cábasán funa nadúga? Ibídiñeti nun jalába lan nareídei sun le nalúbajabei.” ¹⁸ Ába lasáminarun, ába laríñagun. “Subúdi náali cába lan nadúga, nagúnrinchaguaru sun náni lágei líla nádü, ábame nadúgün ámu weínamuti-maatu, ábame nareíduni nalúbajan lúma sun le númabei tídan. ¹⁹ Ábameti naríñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jouba, gurába, gúndaabá.” ²⁰ Laríñaga Búngiu lun. “Wügúri deré tagáambun, bouwe áriebe le, sun le búmabei areídañu, ¿cábasan un lerédera?” ²¹ Ítara líña lasúseredun lun gürígia le adámuridaguagüdüti irísini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

Toúnigi lumútiña Búngiu lirájüñü

(Mt 6.25-34)

²² Ába laríñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun. ²³ Gebégitimaati ibágari sügü láu eígini, gebégi úgubu sügü táu anáanguni. ²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, jougüda lumútiña Búngiu. ¡Gebégitimaatün sügü jáu dunúru! ²⁵ Úati ni ában jídaangiñe gayáraati líchugun lánwoun libágari láu sun luweírin lidíjeri luágu. ²⁶ Ánjein lubeíti siñá lubei jadúgüni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan labouçhun buri fulúri. mawádigimariti, májüchagun ligía lanáangun, áni láu

sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubeí ladáüraguagüdüni Búngiu jíduru, le níjein-bei ugúñe, jarúga lagudúña, ¡ladáüraguagüdatimabadün, loúgua tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladúga lirájüñü ubou le, lárigiñanu buri cátei le, ánjein jugúya, níjein ában Júguchi le subúdijabúbei lun sun jemégeirun. ³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

Írsini siélu
(Mt 6.19-21)

³² ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan. ³³ Alúgura jumeí le júmati, jíchigeime lebégi joun gudémetiña, láu líra, jadúgüñoun lágei seínsu to mawéiyadaditu, irsini siélu le magúmuchaditi, le ní lubei siñá lan jebélurun jíwerutiña anúgei jirisin, úa jagía jamútiri ñi lun jeígini. ³⁴ Naríñagubalin le jun ladúga le ní lumuti jirisin, ñíñoun gíñe janígi.

Aráanseñu jumá, agúrabaja

³⁵ ‘Aráanseñu jumá lubá nagíribudun siélugiñe, durúngu jilámpun. ³⁶ Ítara jumá quei músu ja agúrabañubaña líabin jayúbudiri lídaangiñe ában maríei lun jadáraruni béna lubá, óra lagúarun. ³⁷ Buídubei dan joun músu ja ladárirubaña jayúbudiri agágudúañu dan le lachúlürün, ninárün jáu, iyúbudiri meme ligía laráanseruba, ábame lañúragüdüniña luágu dábula, ábame lesériwiduni jeígin joun. ³⁸ Íbini amídi áriebu lan lachúlüra o lubá lan larúgan, ánjaña ladárrira agágudúañu, buídubei dan joun músu jagía. ³⁹ Subúdi jumeí luágu

lan lan jamúga subúdi láni tabúreme múna cába lan óra lachúlúra jíweruti íweruja, leréderuña jamúga agágudúaño, mígirunti jamúga lun tadárarún lúban lun líwerujoún lumégegún. ⁴⁰ Jugúya, aráanseñu jumá gíñe, ladúga lídaanme magáradajan jumá ligíame nagíribudun, áu le Wügúri Garaúwarügüti, ubouágun.

Músu le úarabei, lúma le múaraanbei
(Mt 24.45-51)

⁴¹ Ábati lálügüdüni Pédro Jesúsu, laríñaga lun.

—Nabúreme, ¿woúnrügü bíchigei jémpulu le ódi joun súngubei?

⁴² Laríñaga Wabúreme Jesúsu lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leágagüdüniña lídan dan. ⁴³ Buídubei dan lun músu le ladárirubei liyúbudiri agúnfulira láu luwádigimari dan le lachúlürün. ⁴⁴ Ninárün jáu, luágu líchugubei lan liyúbudiri lun ligía lan aríja láu sun le libíjubei. ⁴⁵ Ánjein arítagua músu ligía luágu lúgili lan liábin liyúbudiri, ábame lagúmeserun ouseraña jíbiri músu ja lábugiñebaña laríaajan wuríba, leréderame eíga, áta, abácharuada, ⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírín-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷ ‘Músu le subúdijabúbei lun ca lan labúseerubei liyúbudiri áni maráanserunti, mabájüdünleí, labeichúba sarágu. ⁴⁸ Ánjeinti músu le ibídiñeti lun, ába ladúgün cátei lé buri lúnti labeichún lueígiñe, maweírubei labeichún. Le únti líchugúa gíbeti, gíbebei amúriajóuti lúmagiñe, le

gɫbeti ígirúti lábugiñe laríajaan, gɫbetimaabei amúriajouíti lúmagiñe.

Jesúsu lébunabei fánreinguaü

(Mt 10.34-36)

⁴⁹ 'Láu niábin ubouágun, ññbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía! ⁵⁰ Lúnti nasúfurirun le gumúti, ¡meménija nanígi lagúmuchun! ⁵¹ ¿Jarítaguatúnsan luágu barú nán meja darángilau númagua dan le niábinbei ubouágun? Manúgútina darángilau, fánreinguaü nanúgübei. Jafánreinraguba ja maffíñebaña nuágu jáma ja affíñebaña nuágu, ⁵² lúmagiñe guetó, seíngügua tídan ában múna, jafánreinraguba úrüwa jaweí biáma, biáma jaweí úrüwa, nueígiñe. ⁵³ Lagáraguba úguchili luágun liraú, isáani luágun úguchili, úguchuru tuágun tiraú, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

⁵⁴ Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. ⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubeí luáguti ligáburi dan le gádaanbalün jun?

Jóucha jumá lun lídan jumá dan jáma jáganiñu

(Mt 5.25-26)

⁵⁷ '¿Ca uágu siñá lubei jasúbudiruni cátei le úraguabei júngua? ⁵⁸ Ánjein agúaragüda ában gürígia buágu,

ába bídin lúma ligíbugiñe lúruudu, jóuchabá baráanser-agun búngua lúma luágu úma lubáragiñe jachúlürün, manúgün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame lá-darunibu furísunrugun. ⁵⁹ Naríñajare bun luágu má-furidunbadibu lan ñígiñe darí bafáyeiruni lagúmujoún bigáwanün.

13

Ca lan uágu lúnti lubeí lasáansirún igáburi

¹ Lídoun méja dan ligía, ába jayábin gürígia abájüdagua lun Jesúsu jawágu wügúriña Galiléana ja láfaragubaña Piláto úara jáma anímaalu ja áfarawagúbaña lun adá-garagüdüni lun Búngiu. ² Ába laríñagun Jesúsu joun.

—¿Jarítaguatúnsan luágu ladúga lan luweírín jafígoun Galiléana jagía sügú jáu ja jíbiri lílana jageíra lasúseredun-bei le joun? ³ Mára lueígiñe líra, láu sun líra, naríñajare jun luágu ánjein lan masáansirun jumá jigáburi, jóüweguba gíñe sun jugúya. ⁴ Ángi díisi-wídü jagúra ja óüwegubaña dan le láburujanbei wáyelesi le Siloébei jawágun — ¿jarítaguatün luágu weíritima lan jadúnrun sügú jáu ja jíbiri ja aganoúbaña Jerusalén? ⁵ Mára líña gíñe, láu sun líra, naríñajare jun luágu ánjein lan masáansirun jumá jigáburi, jóüweguba gíñe sun jugúya.

Jémpulu tuáguti tídibu ígo to mínboun

⁶ Ábati labájüdaguni Jesúsu jémpulu le joun, laríñaga.

—Ñíñein ában wügúri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati laríñagun lun le óúnigirubalin ichári. “Aríjabásan, úrüwaali irúmu gabúgürügua niábin áluaja ígo tuágu ídibu to, madáritina. Chaúnboun, ¿cába uágu terédera

ñi luágu ni cáta?” ⁸ Ába loúnabuni le oúnigirubalin ichári, ába laríñagun. “Niyúbudiri, ígirayaboun irúmu le, nañúludagüdali múa táu, awoúja áume táu. ⁹ Fágua tagíindun ítara, ánjoun magíindun, ábame tánchugún.”

Lareídaguagüdünnun Jesúsu ában wúri sebúti tanágan lídan wéyu le eméraaguagülei

¹⁰ Luágu ában wéyu le eméraaguagülei, ñíñein Jesúsu arúfudaja tídan jalígílisin juríu, ¹¹ ñíñounti ában wúri, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun. ¹² Dan le laríjinbarun Jesúsu, ába lagúarun tun, ába laríñaga tun.

—Wúri, areídaguaadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴ Ábati lagáñidun tábuti ligílisi ladúga lareídaguagüdünnun Jesúsu lídan wéyu le eméraaguagülei, ába laríñagun joun gürgía ja ñíbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraaguagülei.

¹⁵ Ába laríñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jilúgün bágasu o jilúgün lan burígü lun janúgün áta dúna lídan wéyu le eméraaguagülei? ¹⁶ Wúri to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdünnun lídan wéyu le eméraaguagülei?

¹⁷ Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürgía, gúndaatiña láu cátei lé buri weíriguti le ladúgübei Jesúsu.

*Jémpulu luáguti tíla mostása**(Mt 13.31-32; Mr 4.30-32)*¹⁸ Ábati laríñagun Jesúsu.

—¿Ída líña ligáburi larúeijan Búngiu? ¿ca cátei úmounbei gayára lan níchuguni? ¹⁹ Ítara líña quei ában liraúraü tíla mostása le lábunubei ában wügúri lichárirugu, ába labouíchun, ába laweíridun darí lun liábin lun ábanme lan tídibu wéwe weíriti, darí lun jadúgün dunúru jádibu luágu tuburébu.

*Jémpulu luáguti ísi**(Mt 13.33)*²⁰ Ábaya laríñagun Jesúsu.

—¿Ca cátei úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában wúri tídoun úríwa líburu fulúaarú, ába terésirun súnqubei.

*Béna le bürúraübei**(Mt 7.13-14, 21-23)*

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aúdü lúma lirájüñü fulásu le ídaangiñebei lásügúra. ²³ Ába laríñagun ában wügúri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába laríñagun.

²⁴ —Bürúraüti lubéneri siélu, jóucha jumá lun gayáraabei lan jebélurun lídaangiñe, ladúga quei naríñaguni jun, sarágujaba busúentiña jebélurun, siñábei. ²⁵ Lárigiñe ladáuruni tabúreme muna lubéneri, jugúya le bougudibei jadaúnjaba luágu béna, jaríñagame. “Wabúreme, darába béna wabá.” Ábame loúnabunün, laríñagame jun. “Íbídiñetün nun, íbídiñe gíñe nun jalána jumá.” ²⁶ Ábameti jagúmeserun aríñaga. “Jóujúadiwa,

gurá wagía búma, arúfudaja amúrü woun úmadarugu.”
²⁷ Ábamei loúnabunün, laríñagame. “Aríñaga náali jun luágu ibídiñe jumá nun, ibídiñe nun jalána jumá. Díse jumá nueí, sun jugúya le adúgübei wuríbani.”
²⁸ Ligíaba jayájuaian, acúnrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin.
²⁹ Jayábiba gürígia lueígiñe oúbaü le nígiñe lubeí láfuara wéyu lúma lueígiñe le nígiñe lubeí lálüda, lueígiñe núru lúma lueígiñe suédi lun jañúurun eíga lídan larúeijan Búngiu. ³⁰ Níbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

Layájun Jesúsu jawágu lílana Jerusalén
 (Mt 23.37-39)

³¹ Lídan méme wéyu ligía, ába jayábin fariséogu, ába jaríñagun lun Jesúsu.

—Beíba yágiñe, ladúga busénti Heródes láfarunibu jilágubei.

³² Ába laríñagun joun.

—Jeíba, jaríñagame lun wügúri bíbuti ligía. “Ugúñe lúma jarúga naságajan espíritugu wuríbatiña jádaangiñe gürígia, areídaguagüda áu sánditiña, lárigiñe jarúga, lásurun nuwádigimari. ³³ Lúnti nasígiruni nuweíyasun ugúñe, jarúga, lúma lárigiñe jarúga, ladúga máma lúnti lafarúniwa ában proféta jilágubei bougudi lueí Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chúgua jugúya dúbü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúni-girunün quei tatoúnigiruniña gáyu tirájüñü lábugiñe

tarúna, májatün! ³⁵ Ígira láadün Búngiu, áni naríñajare jun luágu maríjindügüya jumáadina lan daríme lachúlürün dan lun jaríñagun. “Biníwati le ñúbinbei lídan líri Wabúreme.”

14

Lareídaguagüdün Jesúsu ában wügúri lújali larúna luma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jaríaguñein Jesúsu. ² Ñíñein gñe ában wügúri láu sándi le ílu, ³ ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídaguagüdün ában wügúri lídan wéyu le eméraaguagülei ódi siñáti?

⁴ Ába jeréderun maníñu. Ábati lanúgüni Jesúsu sánditi ligía, ába lareídaguagüdüni, ába laríñagun lun lun lídin.

⁵ Ába laríñagun joun fariséogu.

—Furúmieguarügü jídaangiñe, ánjein eíguada lilúgün bágasu o lilúgün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le joúnbei ja weírigubaña, ába laríñagun joun.

⁸ —Dánme le bamísurajoún lídoun ában fédu lánina maríei, máluajabeí lubuídun-ágei ubáraü, ñúbin liñeín ábanya amísurajoúti weírigutimáati bueí, ⁹ ábame liábin le amísurajabalün, laríñagame bun. “Rúbei bubára lun wügúri le.” Ábameti bídin láu busíganu añúura lídan

lúnabun-ágei ubáraü. ¹⁰ Dánme le bamísurajoún lídoun ában fédu, ñurúba lídan lúnabun-ágei ubáraü, lun dánme lan le liábin le amísurajabalibu, laríñagame bun. “Numáda, sügúba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñúnbaña luágu dábula. ¹¹ Le anáanguti lúngua weíri, lúnabudúba, le únabuti lanáangun lúngua, weíribei lanügún.

¹² Aríñagati gíñe lun wügúri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúleni, ni bíbugañanu, ni jíbiri bidújeñu, ni bubésinanigu ja rísitiña, ladúga jamísurajabadibu gíñe, bibíjubati bafáyeirujaja. ¹³ Dánme le badúgún fédu, amísuraja báña gudémetiña, siñáguatiña úngua, danímaatiña, maríjintiña. ¹⁴ Ábame gúnda ban, ladúga siñáti jafáyeirunibu, bibíjubeiti bafáyeirujaja lídaanme le jásaarun ja richáguabaña ligíbugiñe Búngiu lídaangiñe ouweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügúri, íchuguti ában oúnwenbun adíneruni, ába loúnajan amísuraja sarágu gürígia. ¹⁷ Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.” ¹⁸ Súngubei, ába jaríñagun luágu siñá lan jóúdin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹ Laríñaga ában. “Agáñijaadina seíngü féru bágasu lánina wadágimanu,

neŕbuga oúchaña, adúgabá fuleísei nun, ferúduna bána, siñáti nídin.”²⁰ Laríñagaya ában. “Sun líña namárieidun, ligía siñá lubei nídin.”²¹ Dan le lagíribudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.”²² Lárigiñe ladúgüni, ába laríñagun músu lun liyúbudiri. “Nabúreme, adúga náali le bubeíbei nun, níjein mémegua ubáraü.”²³ Ábati laríñagun iyúbudiri lun músu ligía. “Beíba lídan sun úma boúgudin lueí ubúругu, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban.²⁴ Ladúga naríñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibei lan Crístu

²⁵ Sarágu jáña gürígia afálaruti Jesúsu, ába lagáraragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúleno, o lítunu, o libágari guánarügü, sügü náu.²⁷ Le gíñe májabei lasúfurirun nueígiñe queísigubeirügü jamúga ában wügüri le anúgüti lugúruwan, siñáti náni lan disípulu.²⁸ Ánjein arítagua ában jádaangiñe ladúgün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubeí lun lagúmuchuni?²⁹ Ladúga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu,³⁰ jaríñagame. “Guméseti wügüri le ában wadágimanu, siñá lumuti agúmucha.”³¹ Ánjein lawúribuja lubeí ában urúei lúma ámu urúei, ¿ma funági

ñurúti furúmiñe lun lasáminarun ánjein gayáraabei lubeí lageíndagun jáu díisi mílu súaara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idlí. ³³ Ítara líña lubeíti, furúmieguaugü jídaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt 5.13; Mr 9.50)

³⁴ ‘Buíti sálu, ánjein leféridira lubásuan, ¿cábago un ju lan? ³⁵ Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun

(Mt 18.10-14)

¹ Luágu ában wéyu, ába jayárafadun sarágu agúbura-jatiña liseínsuna gumádi jáma gaffigountiña lun Jesúsu lun jagáambuni. ² Ába jadímurejan fariséogu jáma arúfu-dajatiña lilúrudun Moisés luágu Jesúsu lueígiñe cátei le, jaríñaga.

—Wügúri le, resíbi lumútiña gaffigountiña, jou ligía jáma.

³ Ábati líchuguni Jesúsu jémpulu le joun, laríñaga.

⁴ —¿Ca jídaangiñe, lun jamúga galúgüniña lan san mudún, leféridira ában jídaangiñe, mígirun lubáña gádürü-wein-díisi-néfu ñi, lubárúa, lun lídin áluajoun mudún to eféridiruboun? ⁵ Dan le ladárirunun, ába lanúgünun légewagu láu ugúndani. ⁶ Dan le lachúlürün lúbiñoun, ába loúndaruniña lumádagu jáma lubési-nanigu, laríñaga joun. “Gúnda jumá úara núma, ladúga

darína nilúgün mudún tó yebe eféridiruboun nueí.”
 7 Naríñajare jun luágu ítara méme líña weíritima lan ugúndani siélu luágu ában gafígounti le asáansiruti luríban ligáburu lun lafálaruni Búngiu, sügú láu jawágu gádürü-wein-díisi-néfu gürígia richágutiña ligíbugiñe Búngiu ja memégeirunbaña jasáansiruni jagáburu.

Jémpulu luáguti seínsu le eféridirubei

8 ‘¿Ca wúri to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni? 9 Dan le tadáriruni, ába toundaruniña tumádagu jáma tubésinanigu, taríñaga joun. “Gúnda jumá núma, ladúga darína seínsu lé yebe neféridirubei.”
 10 Naríñajare jun luágu ítara líña lan giñe ugúndani jádan láni Búngiu ánjeligu luágu ában gafígounti le asáansiraguti luríban ligáburu lun lafálaruni Búngiu.

Jémpulu luáguti irájü le acháragadubei

11 Rúlumuti giñe Jesúsu jémpulu le joun, laríñaga.

—Ñíñein méja ában wügúri jáu bián lirájüñü. 12 Ába laríñagun le amúleñein lun lúguchi. “Núguchi, rubei alágan le yubei nun nun guetó.” Ába lafánreinjani úguchili alágan jádan biángubei. 13 Málüti luegiñe, ába loúndaruni amúleñein sun lumégegungun, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. 14 Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei. 15 Ábati lídin áluaja wadágimanu lúma ában lílana fulásu ligía, ába loúnajani wügúri ligía oúnigiraña lilúgüniña büúruju. 16 Weíriti liláma darí lun lawámadun lun lun leígini jeígin büúruju, míchugúnwati lun. 17 Ábati

lasáminarun, laríñaga lúnguarügü. “¡Sarágu ñadágimeintiña lúbiñe nóguchi ígiraguati éigini joun, áu ya, ouwe niláma! ¹⁸ Nagíribuda le ñíjin lubeí nóguchi, naríñagame lun. Nóguchi, afgounjaadina ligíbugiñe Búngiu lúma bigíbugiñe. ¹⁹ Madúnaali lun nanáangun núngua quei biraú, barúbana quei ában jádaangiñe ñadágimeintiña búma.” ²⁰ Ába lárügüdün úma lun lagíribudun lúbiñoun lóguchi.

‘Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába louburuni, ába lachúuruni. ²¹ Ábati laríñagun isáani lun. “Nóguchi, afgounjaadina ligíbugiñe Búngiu lúma bigíbugiñe, madúnaali lun nanáangun núngua quei biraú.” ²² Ába laríñagun úguchili joun lumúsuníña. “Sagájumoun tubúidun-ágei anáanguni furése, daúguagüda jumeí. Daújuma giñe ában bágü luágu lújabu túma geídi luágu lugúdi. ²³ Áfara jumeí liraúraü bágasu le dibúnetimaabei. ¡Weíga, eféduja wagíame!, ²⁴ ladúga niraú le, rúnaali yebe quei jiláali áni chúlúguaya, féridijalí yebe áni daríwama.” Ába jagúmeserun eféduja.

²⁵ ‘Súnti buga dan le, níjeinti buga íbugañaü áraabu. Dánti le lagíribudun, dan le lachúlürün tubádun múna, ába lagáambuni áfaruni lúma abínajani. ²⁶ Ábati lagúarun lun ában jádaangiñe músu, ába lálügüduni ca lan susérebei. ²⁷ Ába laríñagun lun. “Chúlújali bamúlen, áfaragüdalá bóguchi liraúraü bágasu le dibúnetimaabei, ladúga lachúlürün láu magádiei.” ²⁸ Ába lagáñidun íbugañaü, májaali lebélorun. Ába láfuridun lóguchi, ába layúmuragun lun lun lebélorun. ²⁹ Ába laríñagun lun lóguchi. “Subúdi bumúti luágu seríwíjadina lan

bun sarágu dan, madúraagunganeí le bubeíbei ni ában weíyaasu, míchugidibu ni ában liraúraü gábara nun lun nefédujan jáma numádagu. ³⁰ Guetóti, láu liábin biraú le, le achágarubalin biseínsun jáma wúríña wuríbatíña, jáfaragüdabá bágasu le dibúnetimaabei!” ³¹ Ábati laríñagun úguchili lun. “Niraú, amúrü númañadibu súnwandan, sun le náni, báni. ³² Ánjein guetó, lúnti wadúgün fédu lúma lun wagúndaarun ladúga bamúlen lé yebe rúwamaalíbei quei jiláali, chülúguaya, féridijalí yebe, áni dariwama.”

16

Jémpulu luáguti oúnigiruti le múaraanbei

¹ Aríñagati gíñe Jesúsu joun láni disípulugu.

—Ñíñein méja ában iyúbudiri rísiti, ñíñein gíñe ában loúniri lumégegun, ába jayábin aríñaga lun luágu lachágaruñein lan oúnigiruti ligía lirísín. ² Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladúga masígijadibu oúnigirei nílagu.” ³ Ábati leréderun oúnigiruti ligía asáminara, laríñaga lúnguarügü. “¿Cábatí nadúga guetó lárígíñe gidála lan niyúbudiri wadágimanu nueí? Méretina lun nadúgün wadágimanu júrüti, áni nibúsigaritina lun namúriajan. ⁴ Subúdi náali cába lan nadúga lun ñí jama erésibirutina jábíñe dánme mawádigimaríjadina.” ⁵ Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?” ⁶ Ába laríñagun lun. “Dúwei numúti san barín agúlei.” Ábati laríñagun oúnigiruti

ligía lun. “Nuján bigáradan, ñurúba furése, badúgame ában luágurügü dimi-san.” ⁷ Lárigiñe, ábaya lálügüdün ában, laríñaga lun. “Ángi amúrü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adúgabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu ónigiruti ligía lídan ligáburí ladúgüni cátei.

Ligía laríñagun Jesúsu.

—Gürígia wuríbatiña ja lánina uboú le, chúti jáu lídan jáni jáma ámu sügú jáu ja lánina larúgounga, ja lirájüñü Búngiu. ⁹ Siñáti leménigidún luágu irisini lánina uboú le, aríñagatina lubeíti jun lun jayúsuruní jirisin lun jadúgün buíti, lun dánme lan le lagúmuchun jibágari, jerésibirúba tídan múna to magúmuchaditu, yágüta siélu.

¹⁰ ‘Le adúgüti buíti láu le murúsunrügüti, ladúgüba gíñe buíti láu le gíbeti, le madúgünti buíti láu le murúsunrügüti, madúgünbei gíñe buíti láu le gíbeti. ¹¹ Ánjaün lubeíti madúgün buíti láu buri irisini le láni uboú le, le uágubei siñá lan leménigidún, ¿cábagi afíñera juágu lun ledéregerun irisini inárüniti lábugiñe jaríaajan? ¹² Ánjaüti madúgün buíti láu jemégen ámu, ¿cábagi íchigei le jáni guánarügü jun?’

¹³ ‘Siñáti lesériwidun ában gürígia joun bián iyúbudirigu, ladúga liyéreeguduba ában lun, línsiñedame le ában lun, o úarabei lan lun ában, lanúgeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjer-ajan láu Jesúsu, ladúga jínsiñe lan seínsu joun. ¹⁵ Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janúgübei gürígia quei weíríti cátei, iyéreeguti lun Búngiu.

Lúrodu lúma larúeijan Búngiu

¹⁶ ‘Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóúchatiña lun jebélurun lídoun.

¹⁷ ‘Méreeguntimaati lun lagúmuchagun siélu lúma uboú, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸ ‘Ánjoun lígira ában wügúri lúmari, lagámarida ámu, ladúgüñein figoú le gíríbei adultériu, le gíñe agámariduti ában wúri to ígiraguaaru, ladúgüña gíñe adultériu.

Wügúri le rísíbei, lúma Lázaro

¹⁹ Aríñagati gíñe Jesúsu.

—Níñein méja ában wügúri rísiti, anáanguni fínutu to wéndegutu ladáüraguboun, ságüja wéyu ladáagun fédu láu sarágu wéndegu. ²⁰ Níñein gíñe ában gudémeti gíríti Lázaro, sun lúra láu gumeín, ²¹ lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weíríti lasúfurirun darí lun lawánduni jayábin oúnli éjelujei lugúmein. ²² Luágu ában wéyu, ába loúnwen fugiábu ligía, ába janúgüni ánjeligu lúmoun Abrahám, le ñíjin jabeí jiláaña buítiña, ába gíñe loúnwen rísiti, ába lábunajoún. ²³ Dan le lasúfuriruña lan rísiti ligía lídan fulásu le ñíjin jabeí

jiláaña wuríbatíña, ába liñúruni laríjin, ában laríjini Abrahám dísegiñe, láu Lázaro lúma. ²⁴ Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladúdüragüdüni ligíbu lújabu láu dúna, ñúbin lámuga éderei tuágu niñéñe, ladúga nasúfuriruña sarágu lídan wátu geméti le.” ²⁵ Ába laríñagun Abrahám lun. “Niraú, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira. ²⁶ Bougudigiñe luef sun le, níjein ában baráangu afánreinraguáwa júma, ja jamúga buséñtiña jóudin yágiñe lun ñíjin, siñáti, ni ja ñíbaña, siñáti jayábin ñájoun.” ²⁷ Ábati laríñagun rísiti. “Amúriajatina búma, Núguchi Abrahám, lun boúnajani Lázaro lúbiñe núguchi, ²⁸ añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.” ²⁹ Ába laríñagun Abrahám lun. “Níjein le labúrújabei Moisés jáma profétagu jáma ñi, jadúga jamá gásu láu!” ³⁰ Ába loúnabun rísiti, ába laríñagun. “Binárün, núguchi Abrahám, láu sun líra, ánjein ñúdüñ ában jádaangiñe jiláaña adímureja joun, lasáansiraguba jagáburi.” ³¹ Laríñaga Abrahám lun. “Án-jein mája jabeí jadúgün gásu láu le laríñagubei Moisés jáma profétagu, mafíñebañá gíñe láu sun lásaarun ában jádaangiñe jiláaña lun lídin adímureja joun.”

17

Luríban lafígoungüdüniwa ában güri-gia

(Mt 18.6-7, 21-22; Mr 9.42)

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afígoungüdüti güri-gia, jáni fugiábu güri-gia le afígoungüdüti ámu!

² Buítimaati jamúga lun lun lagurún baránajoun láu ában dúbü le lamúlija awási güráñu luágu ligíina sügú láu lafígoungüdün ában jádaangiñe ja ñúbüriigiñabaña lídan jafíñen nuágu. ³ Ítara líña lubeíti toúnigi jumá.

‘Ánjein adúga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí, ⁴ ánjein adúga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madúgündügüya láali lan, lúnti ferúduna báni.

Lubáfu afíñeni

⁵ Ába jariñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü afíñeni jídan — gayáraati jamúga ñúraüraü lan queísi ában tíla mostása— gayáraati jamúga jariñagun tun tídi bu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateín-giruníwa luágu

⁷ ‘Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawóujan o loúnigirun lan anímaalu, ¿laríñaguba funági lun músu ligía. “Belúba, ñurúba eíga”? ⁸ Uá, aríñagarügübei lun. “Aráansebei neígin, aráanseñu amúrúme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.” ⁹ ¿Teínqui lumúti funági iyúbudiri músu luágu ladúgüni le lubeíbei lun? Uá. ¹⁰ Jugúya giñéti, dánme lásurun jadúgüni le uágubei laríñaga Búngiu jun lun

jadúgüni, lúnti jaríñagun. “Músu moúntiña wagía, ladúga lé rügúñein lúnbei wadúgüni wadúga.”

Lareídaguagüdün Jesúsu díisi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa. ¹² Dan le lachúlürünbei lídan ában liraúraü fulásu, ába jayábin díisi wügúriña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—¿Jesúsu, Maésturu, gudéme wamá bun!

¹⁴ Dan le laríjinbaliña Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun. ¹⁵ Níñeinti ában jádaangiñe, dan le laríjinbei luágu areídaguaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wügúri ligía. ¹⁷ Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu? ¹⁸ ¿Niján gubeírügü teréncha le agíribuda eteíngirei Búngiu?

¹⁹ Ábati laríñagun lun wügúri ligía.

—Sarába, beíba, areídaguaadibu ladúga baffñen.

Ída lúba lan ligáburi liábin larúeijan Búngiu

(Mt 24.23-28, 36-41)

²⁰ Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, marijínbei,

²¹ maríñawagúnbei. “Niján”, o “Níngitan”, ladúga lídan linárün cátei, níjeinjali larúeijan Búngiu jagánagua.

²² Ábati laríñagun joun láni disípulugu.

—Lachúlürüba dan lun meménija lánme janígi lun júmabadina lan, íbini luágurügü ában wéyu, masúsere-dunbei lídan dan ligía. ²³ Laríñawagúba jun. “Niján Crístu ya”, o “Níngitan yágüta.” Iyéenibei, mídin jumá járigi, mafálarun jumáñame. ²⁴ Ladúga ítara quei larijín ában labírijaníga lueígiñe ában loúba siélu lun luágun le ában, ítara lúba dánme le nagíribudun ubouágun, áu le Wügúri Garaúwarügüti. ²⁵ Lúnti nasúfurirun sarágu furúmiñe, mebéresen jagíame güriquia ja lánina dan le náu. ²⁶ Queí meja lasúseredun lídan lidáni Noé, ítara lúba gíñe lasúseredun lídan búrime wéyu le niábingüle, áu le Wügúri Garaúwarügüti. ²⁷ Dán meja ligía, jerédera meja güriquia eíga, áta, agámarida, íchaajaña jarájüñü lun jamárieidun darí wéyu le lebélorun Noé tídoun ugúnein to árca. Ába liábin gúnran, ába jañáradagun súnqubei. ²⁸ Ítara lúba gíñe quei lasúseredun lídan lidáni Lot. jerédera güriquia eíga, áta, agáñija, alúguraja, ábunagua, adáagua múna. ²⁹ Dan le láfuridunbei Lot ubúrugugiñe Sodóma, ába láburujan wátu geméti lúma sífuru siélugiñe, ába láfaraguniña súnqubei. ³⁰ Ítara lúba dánme le niábin, áu le Wügúri Garaúwarügüti.

³¹ ‘Lídaanme wéyu ligía, le güriquia le bougudibei tueí lúban, ánjein níjein lubeí lumégegun múnada, mebéluralá aságarei. Le güriquia le áraabubei lídan óra ligía, magíribu-dalá lúbiñoun. ³² Jarítagua jumá luágu le asúseredubei tun lúmari Lot. ³³ Le áluguti leséfuruni libágari ya ubouágu, leféri-dirubei ibágari magúmuchaditi, le ánjabei leféri-diruni libágari ya ubouágu, nueígiñe, libíjuba ibágari magúmuchaditi.

³⁴ ‘Nariñajare jun luágu áriebu lánme ligía, ñibaña bíama güriquia arúmuga tídan ában meme gabána, lanügúba ában jádaangiñe, ígirúame le ában según jafíñen

nuágu. ³⁵ Ñíbaña biáma würiña amúlija lídan ában, tanügúba ában jádaangiñe, ígirúame to ában. ³⁶ Ñíbaña biáma wügúriña áraabu, lanügúba ában jádaangiñe, ígirúame le ában.

³⁷ Dan le jagáambunbalin cátei le, ába jálügüdüni, jaríñaga lun.

—¿Jalíabasan lasúsereda buri cátei le, Wabúreme?

Laríñaga joun.

—Le ñí lumuti lúgubu jiláali, ñíba jóundaragua wadúbi.

18

Jémpulu tuáguti würi to jiláali túmari, lúma agúseragüdüti

¹ Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu. ² Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában güri-gia. ³ Ñíñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, larígiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵ quei nuján méme lan würi to ásüdagüda nichúgü, neséfuraaru, jebé lámuga tiábin, gumú líñein nugúraasun.”

⁶ Ába laríñagun Jesúsu.

—Niján laríñagubei agúseragüdüti le wuríbabei, ⁷ gúbumeti leséfuraña Búngiu lánigu ja ayúmragutiña lun wéyuagu, áriebu. ¿Lúbei lubá líderaguniña? ⁸ Uá, madárasanbei. Láu sun le, dánme le nagíríbudun, áu le Wügúri Garaúwarügüti, ubouágun, ¿nadáriruba funásan afíñeni jádan güri-gia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu gürígia quei ni cáta. Laríñaga.

¹⁰ —Ñúdutiña bián wügúriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia—jíwerutiña, wuríbatiña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnumuti gíñe diisi gáwanün lídaangiñe ságü fiádürü le ebélurubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun liñúrui laríjin siélun, le luweírín lúnabun lanáangun lúngua. Aboújarügüleí laníguagu láu igárigu, laríñaga. “¡Búngiu, gudémená bun, nugúya le gaffigounti!” ¹⁴ Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladúga le anáanguti lúngua weíri, ñúraübei lanügún, ánjein le ñúraübei lanáangun lúngua, weíríbei lanügún.

Labíniruniña Jesúsu irájüñü

(Mt 19.13-15; Mr 10.13-16)

¹⁵ Anaajouatiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeín-jan joun ja anáajabaliña irájüñü. ¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladúga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu affíneni jarúmati líbe jaffínen irájüñü, mebélubei lídoun.

Layánujan ában wügúri rísiti lúma Jesúsu
(Mt 19.16-30; Mr 10.17-31)

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadúgüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. ²⁰ Subúdi bumúti gumádi. Maganouábá túma wúri gámaritu, máfarajabá, míwerujabá, mayéejabá luágu ni ában, inébe jamá bagúbürigu bun.

²¹ Laríñaga wügúri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badúgüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarunina.

²³ Dan le lagáambunbalin wügúri ligía cátei le, ába lírudagun, ladúga rísiti buídu. ²⁴ Dan le laríjini Jesúsu lírudagun, ába laríñagun.

—Jénreenguti lun jebélurun rísitiña lídoun larúeijan Búngiu! ²⁵ Méreenguntimaati lun lásügürün ában caméyu lídaangiñe lujúyun ában agúsa sügú láu lebélurun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei gürígia adúga, gayára lumúti Búngiu, ladúga úati ni cáta siñáti lun Búngiu.

²⁸ Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Ninárün jáu luágu furúmieguarügü lan le ígiruti lúban, o lagúbürigu, o líbugañanu, o lamúlenu, o lúmari, o lirájüñü luágu larúeijan Búngiu, ³⁰ libíjubatíma sarágu weíyaasu lougiñe lídan ubou le, ibíjaleíme ibágari magú-muchaditi yágüta siélu.

Ladímurejaanya Jesúsu luágu louñwen

(Mt 20.17-19; Mr 10.32-34)

³¹ Ába lagúarun Jesúsu joun láni dúusu apóstologu jábugua, ába laríñagun joun.

—Weíbuga Jerusalén guetó, le ñíba lubei lagúnfulira sun le jabúrújabei profétagu nuágu, áu le Wügúri Garaúwarügüti. ³² Jedéregerubadina joun ja mámabaña juríu, jéjerajaba náu, anába jamáname, suégua. ³³ Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lúruwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

Lareídaguagüdüñ Jesúsu ában Jericóna maríjinti

(Mt 20.29-34; Mr 10.46-52)

³⁵ Dan le achúlüreinaali Jesúsu ubúrugun Jericó, ñíñein ában maríjinti ñun láru úma amúriaja. ³⁶ Dan le lagáambunbei maríjinti ligía jásuüjjan sarágu gürígia, ába lálügüdajan ca lan susérebei. ³⁷ Ába jaríñagun lun luágu niján lan Jesúsu Nazarétna ásügüra ñígiñe. ³⁸ Ábati lagúaragun, laríñaga.

—¡Jesúsu, le ladúgawagun Davíd, gudémená bun!

³⁹ Ja lubá lubáabaña, ába jadeínjan lun lun lámanichun, ligíatima lagúaragun.

—¡Ladúgawagun Davíd, gudémená bun!

⁴⁰ Ábati laráramagun Jesúsu, ába loúnajan anúgei. Dan le yaráfaali lun, ába laríñagun lun.

⁴¹ —¿Ca babúseerubei nadúgün bun?

Ába laríñagun lun.

—Nabúreme, buséntina naríjin.

⁴² Laríñaga Jesúsu lun.

—¡Ibójabeí baríjin! Areídaguaadibu ladúga bafíñen.

⁴³ Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

¹ Ábati lebélorun Jesúsu fulásurugun Jericó, ába lásügürün ubúrugugiñe. ² Ñíñein ában wügúri rísiti, gíríti Zaquéo, jábuti agúburajatiña liseínsuna gumádi. ³ Buséntiti Zaquéo laríjini Jesúsu lun lasúbudiruni, siñáti laríjini ladúga ñúraüraüti lúgubu, áni gíbetiña gürígia. ⁴ Lúnti gayára lan laríjini, ába leíbaagun ubáraü, ába laweínrun tuágun ában tídíbu wéwe sicóromo yaráfa lun

le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladúga lúnti neréderun búbiñe ugúñe.

⁶ Ábati larárirun Zaquéo furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaquéo, ába laríñagun lun Jesúsu.

—Nabúreme, níchiga lamídan le núbabei joun gudémetiña, áni ánjein íwerujaadina lubeí lueí ában gürígia láu eyéeraguni, náguuyugüdüba gádürü weíyaasu sügú láu lun.

⁹ Laríñaga Jesúsu lun.

—Sálbañu jáña títana múna to ugúñe, ladúgawagun gíñe Abrahám amúrú. ¹⁰ Ligía niábinbei ubouágu, áu le Wügúri Garaúwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹ Dan le añája lubeí gürígia agáambajei laríñaguni buri Jesúsu cátei le, ába labájüdagun ában jémpulu joun, ladúga ayarafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹² Ábati laríñagun joun.

—Ñíñein ában wügúri íñugutiña lidújeñu, leíbugati wügúri ligía lídoun ámu fulásu díseti lun líchugúniwa lurúeiteme lageíra, ábayame lagíribudun. ¹³ Lubáragiñe láfuridun, ába loúnajan jawágu díisi jádaangiñe lumú-suniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le darí nagíribudun.” ¹⁴ Queíti liyéreegunbei

wügúri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageíroun. Dan le lachúlürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe laríñagun lun. “Bagúmadija lídan seíngü fulásu.” ²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladúga nanúfude bueí, ²¹ ladúga ában ban wügúri derégüdati, reídeitibu láu cátei le mawádigimaritibu luágu, alúbaja amúrü le ní lumuti mábunagun ban.” ²² Ábati laríñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálin luágu ában nan wügúri derégüdati, luágu reídei nan láu cátei le mawádigimaritina luágu, alúbaja áu le ní lumuti mábunagun nan, ²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴ Ába laríñagun joun ja níbaña. “Gidájumei seínsu lueí, rújumei lun le díisibeí lúma.” ²⁵ Ába jaríñagun lun. “Wabúreme, níjeinga díisi seínsu lúma.” ²⁶ Ába laríñagun urúei. “Naríñajare jun luágu sun lan le adúgati buíti láu le lúmabei, libíjuba lánwoun, ánjein le madúgünti ni cáta buíti láu murúsun le lúmabei, lagídarúaba murúsun ligía lueí. ²⁷ Játí náganiñu,

já yebe mabúseerúnbaña lun urúei nan, barújumaña ñájoun, áfaragua jumáña jilágubei nigíbugiñe.”

Lebélurun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá. ²⁹ Dan le chúlú mémeeli lídoun buri fulásu le Betfajé lúma Betánia, yaráfa lun wúbü le gírubei Olívos, ³⁰ ába laríñagun joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, dánme le jachúlürün ñi, jadáriruba ában burígü güaráñu le maweinrúngili. Jafáragadeíme, ábame janúgüni ñájoun. ³¹ Ánjaün álügüdüwa ca lan uágu jafáragadei, jaríñagame luágu busén láani Jabúreme.

³² Ába joúdin, ába jadáriruni ítara quei laríñaguni Jesúsu joun. ³³ Dánti le añája lubeí afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴ Ába joúnabuniña.

—Ladúga busén láani Wabúreme.

³⁵ Ábati janúgüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun. ³⁶ Quei awáansereina lan Jesúsu, átulejeina jamoún janáangun luágu úma lubá. ³⁷ Dan le jayárafadun lun larárirún wúbü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibe. ³⁸ Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

³⁹ Ábati jaríñagun fariséogu ja ñíbaña jádan güriǵia lun.
—Maésturu, aríñagabá joun bánigu lun jámanichun.

⁴⁰ Laríñaga Jesúsú joun.

—Ninárün jáú luágu ánjaña lan ámanichaja ja, lagúarajaba lán buri dúbü nuágu.

⁴¹ Dan le layárafadun lun Jerusalén, dan le laríjini ubúrugú ligía, ába layájuajan jawágu lílana fulású ligía, laríñaga.

⁴² —¡Lun jamúga gunfaráanda jumáni ugúñe luágu áu lan úmabei lun ñurúguaü jun, buíti jamúga! Má-jatün. ⁴³ Ligía lachúlürüba lubeí wéyu buri wuríbati jun, jadúgame jáganiñu ában baríeru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü. ⁴⁴ Jagúnrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladúga mebéresen jumá láu óra le líabinbei Búngiu asálbaraün.

Larúmadagüdünun Jesúsú témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsú témpulurugun, ába laságaruniña ja alúgurajabaña jáma ja agáñijabaña ñi.

⁴⁶ Laríñaga joun.

—Laríñajare tídan Lerérun Búngiu. “Núban, fulású le ñí lubei gayára lan jayúmuragun güriǵia nun”, ánjein jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsú témpulurugu, añájati jábutigu jafádirigun juríu jáma arúfudajatiña lílúrúdan Moisés, jáma gíñe lábutigu fulású álujaja ída lúba lan jáfaruni jílagubei, ⁴⁸ madáritiña ída lúba lan jadúgüni ladúga weíri lan jórabajóuniwa sun güriǵia lun jagáambuni lerérun.

20

*Lirícha Jesúsu témpulurugu
(Mt 21.23-27; Mr 11.27-33)*

¹ Luágu ában wéyu, dan le témpuluruguñein lubeí Jesúsu arúfudaja joun güriǵia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügúriña weírigutiña lídan jaffñen juríu, ² ába jaríñagun lun.

—Aríñagabeí woun ca lan biríchabeí lun badúgüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdaádün gíñe ában cátei, oúnaba jumána. ⁴ ¿Ca oúnajabalin Juan abásteragüdaja? ¿Loúnajan Búngiu ódi jóúnajan wügúriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu maffñerun wabeí lun. ⁶ Ánjawa aríñaga luágu jóúnajan lan wügúriña, jachámuraguba güriǵia dúbü wawágun, ladúga choúru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnajabalin Juan abásteragüdaja. ⁸ Ábati laríñagun Jesúsu joun.

—Maríñagun nubeí gíñe jun ca lan áu ubáfu nadúgei buri cátei le.

*Jémpulu jawáguti ñadágimeintiña wuríbatíña
(Mt 21.33-44; Mr 12.1-11)*

⁹ Ába lagúmeserun Jesúsu adímureja joun güriǵia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügúri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰ Dan le lachúlürün lidáani alúbajani, ába loúnajan ában lumúsun anúgei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun. ¹¹ Ábayati loúnajan ábanya músu, ába gíñe janábuni, buleísei jameí, oúnaja jameí, míchugunga ni cáta lun. ¹² Ábaya loúnajan ábanya, ábaya gíñe jabúleiseiruni, ába jabúguni ñígiñe.

¹³ ‘Ába laríñagun labúreme ichári lúnguarügü. “¿Cábasán funa nadúga? Nounajaali niraú le jínsiñebei nun, dánme le jaríjini, fágua inébebei joun.” Ába loúnajani. ¹⁴ Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábati ladúga labúreme ichári? ¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷ Ába laríaguniña Jesúsu, ába laríñagun joun.

—¿Cáti lílabei le bürúñubei tídan Lerérun Búngiu le ñí lubei laríñaga.

Lé meja dúbü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dúbü ligía lagúnrinchaguba, léti uágunti láburuja, labúrechagúbei. Áu dúbü ligía.

*Luáguti liseínsuna gumádi**(Mt 21.45-46, 22.15-22; Mr 12.12-17)*

¹⁹ Lidan meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járügüdüni Jesúsu, ladúga jasúbudiruni luágu jawáguti lan jémpulu le laríñagubei, madúgün jamúti ladúga janúfude jaweí gürígia. Ábati jagúrabajan ámu dan. ²⁰ Ábati jóúnajan gürígia ja ásügürütiña jóúngua camá jamuga jarúmatiña lun jaríaaajani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati. ²¹ Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladúga ni cáta lan luweírigun gürígia bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijóún seínsu lun warúeite César ódi mabuídunti?

²³ Ába lasúbudiruni Jesúsu luríban jarítagun, ába laríñagun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le bürúñubei luágu?

Jaríñaga lun.

—Láni César.

²⁵ Ábati laríñagun joun.

—Le láni César rújumei lun César, le láni Búngiu rújumei lun Búngiu.

²⁶ Siñá jamútiti áburugüda tídoun jasádarán láu lé buri laríñagubei jagíbugiñe gürígia, weírirügüti janígi láu loúnabagüle joun. Ába jámanichun.

*Álügüdajani lübügürü ásaaruni lídaangiñe ouweni**(Mt 22.23-33; Mr 12.18-27)*

²⁷ Lárigiñe, ába jóúdin saduséogu aríjei Jesúsú. Jaríñajare saduséogu luágu másaarunbaña lan jiláaña lídaangiñe ouweni lúnya jabágaridun. Ábati jaríñagun lun Jesúsú.

²⁸ —Maésturu, laríñajare Moisés woun tídan lílību-run, luágu ánjein lan ouwe ában wügúri, ába lígírunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadúgawagun lámuga líbugaña le ouwebei. ²⁹ Wel, ñíñanu mejáti sédü wügúriña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabíaman túma buga lúmari íbugañaü, ába gíñe loúnwen marájüñüga. ³¹ Ábati lamárieidun le júrüwan túma, chülú lúmoun le jasédün, jilágua meme jagía, marájüñüga táu. ³² Ába gíñe toúnwen wúri tugúya. ³³ Aríñagabá ában cátei woun. dánmeti le jásaarun lídaangiñe ouweni lúnya jabágaridun, ¿cábati úmari wúri to jádaangiñe, quei maríei tubeí jáma sédügubei?

³⁴ Ába laríñagun Jesúsú joun.

—Lídan ubou le, maríeitiña wügúriña jáma wúriña, ³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe ouweni lúma lun jebélurun siélu agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ ladúga moúnwendügüyaaña gürígia siélu, ítaraañame quei ánjeligu, lirájüñü jañame Búngiu ja saráaña lídaangiñe ouweni. ³⁷ Moisés guánarügü arúfuda lumúti luágu níjein lan ásaaruni lídaangiñe ouweni lídan le labúrjanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacob. ³⁸ Láu dimúrei ligía, arúfuda lumúti Moisés luágu wín-

wangiña lan Abrahám, Isáac lúma Jacób, láu sun jilá lan jágubu, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanúgüniña Búngiu sun gürígia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáali lan.

¿Ladúgawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñásan jaríñagunbei luágu ladúgawagun lan David Crístu? ⁴² Laríñajare David guánarügü tídan líburu to gíriboun Sálmos.

Aríñagati Búngiu lun Nabúreme. “Ñurúba lueígiñe noún-wenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladúgawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu gürígia agáambajei Jesúsu, ába jagáambun laríñagun joun láni dispulugu.

⁴⁶ —Toúnigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesei úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eígini.

⁴⁷ Gidá jamutu gíñe jában würíña ja jiláaña úmari jaweí, lúnti jadáuragun láu, ába jadúgün furíeigi migínaguti. Weírabei jasúfurirun luágu sun le jadúgübei.

21

*Seínsu le tíchugubei ában fugiábu wúri témpulurugu
(Mr 12.41-44)*

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíñe tíchugun ában wúri jiláali túmari, gudémetu, bián gáwanün tídoun gáfu. ³ Ába laríñagun Jesúsu.

—Ninárün jáu luágu gíbetima lan tíchugun fugiábu wúri to sügú jáu súnugubei, ladúga sun jagía, lídaangiñe le ígiragubei jáma jíchiga, ⁴ ánjoun tugúya, láu tugúdeme-gun tíchigei sun le túmabei lún yebe tawínwandun.

*Laríñagun Jesúsu luágu tagúnrinchawagúba lan témpulu
(Mt 24.1-2; Mr 13.1-2)*

⁵ Jadímurejaña fiú güri-gia tuágu témpulu, luágu tubuí-dunmeraü láu lubuídun buri tidúburi lúma buri cátei le jíchugubei güri-gia lun tawéndedun. Ábati laríñagun Jesúsu.

⁶ —Lachúlürüba wéyu lun lagúnrinchawagún sun le jaríagubei tuágu témpulu to guetó, merédebei ni ában dúbü ligíbuagu dúbü.

*Seíni buri lubá lagúmuchun ubou
(Mt 24.3-28; Mr 13.3-23)*

⁷ Ábati jálügüdüni, jaríñaga lun.

—Maésturu, ¿ídame san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafíñera jumá joun, mafálara jumáña.

⁹ Dánme le jagáambun ladímurejoún luágu awúribujani

lúma jawágu güriǵia agárabagua luágun jarúeite, manú-fudedagua jumá, lasúsereduba le furúmiñe, mámagilíme lagúmuchun uboú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹ Ñíbei oúnwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma oúnwenbun buri seíni.

¹² ‘Lubáragiñe lasúseredun sun le, járüjouba, eíbaa-jouá jugúyame. Janügúba agúsera tídan jalígilisin juríu, jádarawagúba furísunrugun, barúwa jugúyame jagíbugiñouñ urúeigu jáma gumádimatiña, nueígiñe, lun jagúseragüdünün, ¹³ ligíame jidáani lun jadímurejan luágu nufúleisein. ¹⁴ Aráanse jumeí jarítangun lun madíjeri jumá cába lan jaríñaga jueígiñegua, ¹⁵ níchuguba dimúrei lúma lichú áu jun le lásíñerun ni ában jádaangiñe já-ganiñu asígenera ni oúnaba. ¹⁶ Jalúgurubadün jagúbürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéreeguduba joun sun güriǵia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meme derégüdagua lídan jafíñen nuágu, jibíjibeí ibágari magúmuchaditi.

²⁰ ‘Dánme jaríjin geyégua jamá lan súaara ubúругu Jerusalén, subúdi jumeí luágu yaráfaali lan lagúnrinchagun ubúругu ligía. ²¹ Jámeti güriǵia ja Judéabaña, lúnti janúrajan luágun buri wúbü, ja ubúругubaña Jerusalén, lúnti jáfuridun ñígiñe, ja áraabubaña, magíribuda jamá ubúругun. ²² Luwéyuri buríbei jafáyeyirun güriǵia luágu wuríbati le jadügübei, dánme le lagúnfulirún sun le бүрүwañubei tídan Lerérun Búngiu. ²³ ¡Fugiábugume würíña ja dageínatiña lídan dan ligía, o ja lan garájüñütiña

ja gurágiña! Ladúga ñíbei sarágu igárigu ubouágu, larúfudubei Búngiu luweírin ligáñi luágu jafígoun gürí-gia ja juríu. ²⁴ Ñíbaña ouwegutiña wuríburugu, jíbiri janáawaguba adáürawagua lídoun ámu ageíraü, ábame jagúnrinchaguni ja mámabaña juríu ubúruгу Jerusalén daríme lagúmuchun dan le íchugúbei joun lun jadúgüni.

Ligáburi ída lúba lan liábin Crístu

(Mt 24.29-35, 42-44; Mr 13.24-37)

²⁵ ‘Lasálrugubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu ubouágu, ábame janúfudedagun luágu lanárimelajúujan lúma labouñjan lugúdi barána. ²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladúga járügüdüba lan warúguma ámu úma. ²⁷ Ábameti larijín niábin, áu le Wügüri Garaúwarügüti, lídan juánriñu láu sun nubáfu lúma oúnwenbun nuweírigun. ²⁸ Dánme le lagúmeserún buri cátei le asúsereda, ragújuma dúgüdaguau, iñúra jumeíme jichúgü, ladúga madíseelime jasálbarun.

²⁹ Rúlumuti gíñe jémpulu le joun.

—Aríja jumouñ tídibu ígo, o furúmieguarügü tídibu wéwe. ³⁰ Dan le jaríjin labouñchun tubána, subúdi jumúti luágu yaráfaali lan lidáani lubáchouga. ³¹ Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Ninárün jáu luágu lagúnrinchawagúba lan sun ubúruгу le Jerusalén lubáragiñe jóúwegun gürígia ja lánina dan le. ³³ Lagúmuchaguba siélu lúma ubou, ánjein nerérun, ladúraruba lun sun dan.

³⁴ ‘Toúnigi jumá, mígira jumá lun tabuñchun janígi láu cátei málati quei sarágu afúuduni, bacháruaü, lúma buri

idíjeri luágu buri cátei lánina ibágari le, márügüdün lámugaün wéyu nagíribudagüle uboúagun lídan magáradajan jumá, ³⁵ quei ában sádara to adárurutu. Ladúga ítara lúba liábin wéyu ligía jawágun sun ja aganoúbaña lídan sun fulásu ya uboúagu. ³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, áriebu, ábaja lídin erédera luágu wúbü le Olívos. ³⁸ Ábaja chülúgiñe jamá gürígia témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfaragun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñounga joun gürígia, ladúga janúfude jaweí.

³ Ábati lagáñeiruni Máfia larítagun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adúga darádu jáma jábutigu jafádiríñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jaríñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá gürígia.

Lagúmu joun leigin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachúlürün fédu le ídaanbei teigúa fein magánatu ísi, ñí lubei gíñe ladágarawagüdüwa mudún le lánina fédu.

⁸ Ába laríñagun Jesúsu lun Pédro lúma Juan.

—Jeíba aráanserei eíginí le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Laríñaga joun.

—Dánme le jebélurun ubúrugin, jadúnraguba lúma ában wügüri táu ában dináa láu dúna, jafálaréime chülú tídoun múna to ñíjin lumúti lebélera. ¹¹ Jaríñagame lun tabúreme múna. “Laríñajare Maésturu. ¿Jigóun rúmu to ñí lubei gayára lan neígini eíginí le lánina fédu jáu náni disípulugu?” ¹² Ábame larúfudun ában rúmu weírítu jun tougíñegua múna, aráanseñu tíña, jaráansereime eíginí ñi.

¹³ Ába jóudin, ába jadáriruni sun cátei quei laríñaguni Jesúsu joun, ába jaráanseruni eíginí lánina fédu ñi.

¹⁴ Dan le lachúlürünbei óra, ába lañúurun Jesúsu jáu lání disípulugu luágu dábula, ¹⁵ ábati laríñagun joun.

—¡Oúnwenbun nabúseerun neígini eíginí lánina fédu le júma lubáragíñe noúnwen! ¹⁶ Ladúga naríñajare jun luágu meígíndügüya náali lan eíginí lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumeí jídaangua, ¹⁸ naríñajare jun luágu mátundügüyaadina lan diweín daríme líabin larúeijan Búngiu.

¹⁹ Lárigiñe, ába lanúgünun fein lújaburugu, ába leteín-giruni Búngiu tuágu, ába lagúbachagunun, ába líchugun-joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumeí le, jarítaguagüleme nuágu.

²⁰ Ítara meme gíñe, lárigiñe jeígin, ába lanúgüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

²¹ ‘Niján wügúri le lúnbei ledéregerunina wáma ya luágu dábula, ²² luáguñadina úma le lúnbei nanúgüni, áu le Wügúri Garaúwarügüti, áni jfugiábutia wügúri le lúnbei lalúgurunina!

²³ Ábati jagúmeserun álügüdagua jádaangua cába lán-funa alúgurei.

Ladímurejoun luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá. ²⁵ Ába laríñagun Jesúsu joun.

—Lídan arúeijani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügúriña jamá ja gadúgatiña fuleísei joun gürígia. ²⁶ Ánjein lídan narúeijan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei. ²⁷ ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ ‘Jugúya úarabañája núma lídan nouchawagun, ²⁹ ligía níchugunbadün lun jarúeijan quei líchugunina Núguchi

lun narúeijan. ³⁰ Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadúgawagun dúusu lirájüñü Israël.

Laríñaguni Jesúsu luágu leyéedaguba lan Pédro láu
(Mt 26.31-35; Mr 14.27-31; Jn 13.36-38)

³¹ Aríñagati gíñe Wabúreme Jesúsu.

—Simón, Simón, amúrijaali Máfia úma lúma Búngiu lun gayáraabei lan louchagunün quei lawánijoún türígu, ³² íbja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dúgüdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan nouñwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu úrüwa weíyaasu lubáragiñe layúgurujan gáyu, baríñaguba luágu íbídiñe nan bun.

Layárafadun lórate ouchwaguni

³⁵ Ábati laríñagun Jesúsu joun.

—Dan le nouñajanbalün maságüteiga, ni láu lágei seínsu, ni geídi, ¿ñíñein funági jemegeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barúloun, barú ligíame lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le. ³⁷ Naríñajare jun luágu lagúnfuliruba lan le taríñagubei Lerérun Búngiu

nuágu. “Ába jabájüdüni jádan wuríbatíña.” Sun le bürúwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní

(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wúbü le Olívos quei ligáburíñaja, ába jóúdin láni disípulugu lúma.

⁴⁰ Dan le jachúlürün lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹ Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴² laríñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügúwalá le nabúseerubei, le la babúseerubei adügúwa.

⁴³ Ábati liábin ában ánjeli siéluigiñe lun líchugun érei lun.

⁴⁴ Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdüñ íruni.

⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janúgüni Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba

layárafadun lun Jesúsu lun lachúuruni. ⁴⁸ Ábati laríñagun Jesúsu lun.

—Júdas, ¿láu ában chúuti balúgurana, áu le Wügúri Garaúwarügüti?

⁴⁹ Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareída-gun. ⁵² Ába laríñagun joun jábutigu fádirigu, joun wügúriña weírigitíña lídan jafíñen juríu, lúma joun jábutigu tisúdaarana témpulu, ja nűbinbaña anúgei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadúgüni jugúndan náu, óraali lun lagúmadijan le labúremebei lubúriga.

Laríñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járügüdüni Jesúsu, ába janúgüni lúbiñoun fádiri le íñutimaabei, ábati lafálaruni Pédro dísegiñe.

⁵⁵ Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan. ⁵⁶ Queíti taríjini ában músu ñun larúgürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

⁵⁷ Ába leyéedagun Pédro, laríñaga.

—Ibídiñeti wügúri ligía nun.

⁵⁸ Murúsun lueígiñe, ábaya laríjini ában, ába laríñagun.

—Jánigu gíñe amúrü.

Ába laríñagun Pédro.

—Máma jánigu áu.

⁵⁹ Queí buri ában óra lárigiñe, ábaya laríñagun ában.

—Inárüni luágu lúmañajañein lan wügúri le ladúga Galiléana gíñe.

⁶⁰ Ábati laríñagun Pédro.

—Íbídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu. ⁶¹ Ába ladígiragun Wabúreme Jesúsú aríja luágun Pédro, ába larítagun Pédro luágu lé buga laríñagubei Jesúsú lun. “Lubáragiñe layúgurujan gáyu ugúñe, beyéedaguba náu úrüwa weíyaasu.”

⁶² Ábati láfuridun Pédro, ába layájun láu igárigu.

Jéjerajan láu Jesúsú

(Mt 26.67-68; Mr 14.65)

⁶³ Ja wügúriña ja oúnigirubalin Jesúsú, ába jéjerajan láu, bei jameí. ⁶⁴ Ába jagúraguni lágu, ába jagáyuajan ligíbuagun, aríñageina jagía.

—¡Bugúya le profétabei, aríñagabeígia ca lan agáyua-jabei buágu!

⁶⁵ Ába buri jaríñagun sarágu ámu cátei anábei.

Jesúsú ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóúndaragun wügúriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janúgüni Jesúsú ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amúrüsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, mafíñebadün nun, ⁶⁸ ánjaün nálügüdagua, moúnabun jubádina, mígi-ragüdün jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügúri Garaúwarügüti, lueígiñe loúnwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amúrü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janúgüni Jesúsu ligíbugiñoun Piláto, ² ába jagúmeserun íchiga lidúnrun, jaríñaga.

—Darí wamaali wügúri le achágaraguágüdaña gürígia, laríñajare luágu moun lan lun wafáyeijan seínsu lun urúei Rómána, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábati laríñagun Piláto lun.

—¿Amúrüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri güriía.

—Madáritina dúru luágu wügúri le.

⁵ Ábatima jaríñagun jére.

—Lachágaraguágüdúñanu sun güriía Judéana láu ligáburi larúfudajan, lagúmesera Galiléagiñe, niján mémegua adúgei chülú ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügü-dajan ánjein Galiléana lubeí wügúri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladúga ñíñein Heródes Jerusalén lídan dan ligía. ⁸ Ába lagúndaaragun Heródes dan le laríjini Jesúsu, ladúga agáambañajaali lan luágu áni lúja labúseerun laríjini, agúrabatiti laríjin ladúgün ában miláguru. ⁹ Ába lálügüdaguni luágu sarágu cátei, moúnabunti Jesúsu ni cáta. ¹⁰ Níñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wéndegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu güriía, ¹⁴ ába laríñagun joun.

—Jugúya anúgübalin wügúri le nun, jaríñaga luágu chagáguagüda láníña güriía, álügüdagua náali jigíbugiñe, áni aríja jumúti luágu madári nan ni murúsun

dúru luágu lídaangiñe le jaríñagubei luágu. ¹⁵ Madáriti gíñe Heródes lidúnrun, giríbugüdalá woun. Arija jumáali luágu madúgün lan ni cáta le lúnti lafarún jilágubei lueígiñe, ¹⁶ nabeíchagüdali lubeíti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdün ában adaürúti fédurugu, ¹⁸ ába jagúarajan súnagubei lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürúña lueígiñe ligía lan ában jádaangiñe ja iñúragubaña jóungua luágu gumádi, lúma lueígiñe láfarajan. ²⁰ Busénti yebe Piláto lígiragüdüni Jesúsu, ábaya ladímurejan joun, ²¹ ligiatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lúrwun weíyaasu.

—¿Cáti wuríbati ladúgübei? Madáritina ni cáta le lúnti lafarún jilágubei lueígiñe. Nabeíchagüdali, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubeíti ladúgüni Piláto le jabúseerubei, ²⁵ ábati lígiragüdüni wügúri le jabúseerubei, le adaürúbei lueígiñe iñúraguni lúma áfarajani, ábati ledéregeruni Jesúsu joun lun jadúgüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába járügüdün ában wügúri Cirénena gíriti Simón, liábiña áraabugiñe, ába janúgagüdüni gurúwa lun, ába lídin láu lárigi lárigi Jesúsu.

²⁷ Sarágu jáña gürígia afálaruti jáma sarágu würíña jádan ayájuajeina, agúarajeina láu íruni luágu. ²⁸ Ába ladígiragun Jesúsu jawágun, ába laríñagun joun.

—Würíña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladúga liábinba buri wéyu dánme le laríñawagún. “Fuleíseiwatiña ja siñábei jagáraüdun jáma gíñe ja marájüñüjañábaña, jáma ja mátagüdajanbaña.” ³⁰ Ábameti jaríñagun gürígia lun wúbü íñuti. “Áburujabá wawágun”, aríñaga jagíame lun wúbü únabuti. “Darúguabá wáu.” ³¹ Ladúga ánjein adúgajabalin sun le láu tídibu wéwe le dúdügili, ¿cábagi madúgün jamá láu le mábeijali? (Ítara líña ladímurejan luoúgua, le madúnrunbei, lúma jawágu ja gadúnrunbaña.)

³² Barútiña gíñe biáma gadúnruntiña lun jafarún úara lúma Jesúsu. ³³ Dan le jachúlürünbei lídoun fulásu le gíribei Lufúlasun Lábu Ichúgü, ába jádaraguni Jesúsu luágu gurúwa jáma gíñe biáma wuríbatiña jagía, ában lueígiñe loúnwenren, ában lueígiñe lubáúna. ³⁴ Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladúga ibídiñeti joun ca lan jadúgübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu. ³⁵ Níñanu gürígia aríagua, ñíñanu gíñe lúrudugu jéjerajaña láu, jaríñaga.

—Sálbati ámu, sálbagonalá gíñeti lúngua, ánjein inárüni lubeí luágu ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña gíñe súdeara láu, láu jayárafadun íchiga tagúbüri diweín lun lun látunun, ³⁷ jaríñaga buri lun.

—Ánjein Jarúeite bubeí juríu, sálbaguabá búngua.

³⁸ Níñeinti ában abúrüjouni louúgiñe lichúgü, laríñajare ñi. “Niján Jarúeite Jurú.”

³⁹ Ába lanábuni ában jádaangiñe wuríbatiña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubei, sálbaguabá búngua, sálba báwame.

⁴⁰ Ába ladeñjan le ában lun louba, laríñaga lun.

—¿Manúfudetibusan lueí Búngiu, bugúya le lábugiñebei ában meme sáfuri lúma? ⁴¹ Wagía, garíchatywa lun wasúfurirun ladúga wafáyeijaña luágu wadúga, ánjeinti wügúri le, madúgünti ni cáta wuríbati.

⁴² Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³ Laríñaga Jesúsu lun.

—Nínárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaún-rün úrüwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le laríjinbalin jábuti súdaara Rómana le asúsere-dubei, ába ladímurejan weírigu luágu Búngiu, laríñaga.

—Inárüni, madúnrunti buga wügúri le.

⁴⁸ Sun gürígia ja ñíbaña, ja aríjubalin le asúsere-dubei, ába jóúdin nígiñe, áfarajeina jameí janíguagu, le jagárigu.

⁴⁹ Ánjaña sun lumádagu Jesúsu jáma giñe würiña ja ñúbinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Ñiñein ában wügúri gíríti José, lídaangiñeti fulásu le gíríbei Arimatéa, le jafúlasun juríu. Buíti ligáburí wügúri ligía, richáguati ligíbugiñe Búngiu, lídaañein líñun-ágei lúrudu le jáni juríu. ⁵¹ Agúrabañu líñein larúeijan Búngiu, magúndaanti lubeíti láu cátei le ladúgübei líñun-ágei lúrudu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma. ⁵³ Lárigiñe laráriragüdüni lueígiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dúbü le ñí lubei úagili lan ni ában abunúti. ⁵⁴ Wáandaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵ Ába jafálaruni würiña já meja ñúbinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü. ⁵⁶ Dan le jagíribudunbei jábiñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraagugülei quei laríñaguni lilúrudun Moisés.

24

Lásaarun Jesúsu lídaangiñe ouweni

(Mt 28.1-10; Mr 16.1-8; Jn 20.1-10)

¹ Wéyu dimáasu, ába jagíribudun würiña luágun umúajaü, bináafingua, barúina jameí ibíñei le jaráanserubei jámagua. ² Dan le jachúlürünbei, mámaali lídan lubára dúbü le lidaú umúajaü. ³ Ába jebélurun lídoun umúajaü

ligía, madári jamúti lúgubu Wabúreme Jesúsu ñi. ⁴ Súnti añája lan ñi arítagua jageí lánfuna, ligía jaríjin bián wügúriña rára jarúgabu táu anáanguni mirítu. ⁵ Queíti jélemuchun láu jagíbu únabun, buin láu anúfudei, ába jaríñagun wügúriña jagía joun.

—¿Ca uágu jáluajei le wínwanbei jádan jiláaña? ⁶ Úati ya, saráli lídaangiñe ouweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügúri Garaúwarügüti, ⁷ luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe ouweni luágu lúrwun wéyu.

⁸ Ábati jarítangun luágu dimúrei le laríñagubei Jesúsu. ⁹ Lárigiñeti jagíribudun umúajaurugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anúgübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri wúriña. ¹¹ Dan le jaríñagunbalin buri cátei le joun apóstolugu, ába janúgüni quei lílülün áu, mafíñetiña joun.

¹² Ába láfuridun Pédro, ába lídin eíbaagueina luágun umúajäü, dan le laríjinbei lurágeirugun, gamísa rügúñoun ñi, úaali úgubu. Ába lídin lúbiñoun láu luweírín anígi láu cátei le laríjubei.

Luágu úma lun Emaúsun
(Mr 16.12-13)

¹³ Luágu méme wéyu ligía, jóúdiña biáma jádaangiñe lánigu Jesúsu lídoun ában liraúraü fulásu gíríti Emaús, úrúwa óra eíbuguni Jerusaléngiñe, ¹⁴ adímurejeina jáña

luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amúrü rügúñein jádaangiñe ja ñíbaña ibídiñejabu lun?

¹⁹ Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladúgübei lúma luágu lerérún ligíbugiñe Búngiu lúma jagíbugiñe sun gürígia. ²⁰ Ábati jedéregeruni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa. ²¹ Rúwamutí yebe wafíñen luágu ligíaba lan eséfurei linásiñun Israél. Úrüwa wéyu guetó lueígiñe lasúseredun cátei le. ²² Láu sun líra, weírigüda jamáli jádaangiñe würíña ja wámabaña wanígi láu jóúdin luágún umúajaiü lubá buga larúgan, ²³ queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu. ²⁴ Ába jóúdin jádaangiñe wíbirigu aríjei umúajaiü, ába jadáriruni ítara quei jaríñaguni würíña jagía, maríjin jamúti Jesúsu.

²⁵ Ábati laríñagun Jesúsu joun.

—¡Louguati gíñe gunfaráanda jumá, lúti gíñe lubá jafíñerun luágu lé meja jaríñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmagiñe buri lilíburun Moisés túmoun sun jalíburun profétagu.

²⁸ Dan le jachúlürün lídoun fulásu le ñíjinbaña lubeí, ába ladúgün Jesúsu camá jamuga lasígiraali leíbugun.

²⁹ Ába jeredun luágu lun leréderun jáma, jaríñaga lun.

—Reídeibá wáma, ladúga ladáruduña áni guñemeeli.

Ábati lebélorun Jesúsu lun leréderun jáma. ³⁰ Dánti le ñurújali jáma luágu dábula, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubeí woun luágu úma, aríñagaleí tíla Lerérun Búngiu woun?

³³ Ábati magúrabajaanjaña lan, ába járügüdün úma lun jagíribudun ubúrugun Jerusalén le ñí lubei jadáriraña únsu apóstolugu oúndaragu jáma giñe jíbiri lánigu. ³⁴ Ába jaríñagun ja oúndaraguñubaña ñi joun.

—Inárüni luágu saráali lan Wabúreme Jesúsu lídaangiñe ouweni lúnya labágaridun, aríja láali Simón.

³⁵ Ábati jabájüdaguni bián wügúriña jagía le asúsere-dubei joun luágu úma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt 28.16-20; Mr 16.14-18; Jn 20.19-23)

³⁶ Nígíña adímureja luágu buri cátei le, ligía lasáriragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítangun luágu pántu lan jaríjubei. ³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan affíñeni le tídan janígi? ³⁹ Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun. ⁴¹ Queíti maffíñen mémegiña lan ladúga ugúndani lúma luweírín anígi le jawágubei, ába laríñagun Jesúsu joun.

—¿Níjeinsan eígini júma ya?

⁴² Ába jíchugun murúsun úduraü súti lun lúma síruudu, ⁴³ ába lanúgüni, ába leígini jagíbugiñe sun jagía. ⁴⁴ Lárígiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le бүрүwañubei nuágu tídan lilíburun Moisés, tídan jalíburun profétagu, lúma tídan líburu to gírīboun Sálmos.

⁴⁵ Ábati gunfaráandagüda lánun Lerérun Búngiu joun, ⁴⁶ ába laríñagun joun.

—Bürüwañu líña luágu lúnti lan loúnwen Crístu, ába lánme lásaarun lídaangiñe oúweni lúnya labágaridun luágu lúrüwan wéyu, ⁴⁷ lúnti lan gíñe lapúrichijoun lídan líri joun sun gürígia uboúagu lun jasáansiruni jóuserun lun ferúdnawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Nouñajabei Sífiri Sándu, le uágubei laríñaga Núguchi Búngiu jun, ítara líña lubeíti, reídei jumá ya ubúrugu Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun
(Mr 16.19-20)

⁵⁰ Ábati lanügüniña Jesúsu bougudin lueí ubúругu chülú Betánia, ába liñúruni lújabu, ába ln ferúdunawa laabíniruniña. ⁵¹ Dánti labíniruniña, ába lamúdeirun jaweí, ába lanügúniwa siélun. ⁵² Lárigiñe jájuduragun lun, ába jagíríbudun járigouñ ubúругun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíriguni lun Búngiu.

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
